

Carta najndyee na seicwanom Pablo na m'aⁿ nn'aⁿ tsjoom Corinto

Xmaⁿndye nn'aⁿ na cwila'yu' tsjoom Corinto

1 ¹ Maja Pablo, cwiluiindyō apóstol cwentaa' Jesucristo na mañequiaya ñ'oom naya 'naaⁿ'aⁿ ndaaⁿ nn'aⁿ nc'e na l'ue ts'om Ty'oots'om. Nquii nn'aaⁿya Sóstenes matseijomñê ñ'eⁿndyō na matseiljeiya cartawaañe. ² Matseicwanoⁿya juuna' ndaaⁿ 'o nn'aⁿ na cwiluiindyō' tmaaⁿ na macwji' Ty'oots'om cwentaaⁿ'aⁿ na m'aⁿ'yo' tsjoom Corinto, 'o na maqueⁿñoⁿ cwentaaⁿ'aⁿ nc'e Cristo Jesús, na jnda tqueeⁿñê na calajomndyō' ñ'eⁿñê, ndo' mati ñ'eⁿ nn'aⁿ meiⁿquiayuucheⁿ na cwilcwii'na xuee' Ta Jesucristo, na cwiluiñê na matsaⁿ'ntjoom joona ndo' mati jaa. ³ Nquii Tsotyaaya Ty'oots'om ñequio Ta Jesucristo catio'naaⁿndyena 'o. Quiana na meiⁿcwii ñomtiuu tic'om'yo' jo ndaana.

Matio'naaⁿñê Ty'oots'om nn'aⁿ nc'e Cristo

⁴ Ñequii'cheⁿ mañequia na quianl'uaa' Ty'oots'om cantyja 'naⁿ'yo' ee naya na matseixmaaⁿ na mañequiaaⁿ na cwito'ñoom'yo' cantyja 'naaⁿ' Jesucristo. ⁵ Ndo' nc'e na matseitjoom'na' 'o ñ'eⁿñê, mañequiaa Ty'oots'om na la'xmaⁿ'yo' cha'tso nnom na mateijndeina' 'o jo nnoom, cha'tso na cwicandaaⁿ na cwila'teincō'yo' ñ'oom'm ndaaⁿ nn'aⁿ ndo' ñequio na cwila'noⁿ'ya'yo' cantyja 'naaⁿ'aⁿ. ⁶ Ndo' na luaa', juu ñ'oom cantyja 'naaⁿ' Cristo teitquioo' na mayuu' juuna' cantyja 'naⁿ'yo'. ⁷ Ndo' na ljo', titseitjoona' 'o meiⁿcwii nnom na mañequiaa Ty'oots'om cha cwicandaaⁿ cwil'a'yo' ts'iaaⁿ 'naaⁿ'aⁿ yocheⁿ na cwimeinⁿdo'yo' na nncuee' xuee quia na nncwjee'nnda' Ta Jesucristo. ⁸ Nquii Ty'oots'om wjaañequiaaⁿ najnda'yo' na cwindye'ntjom'tyeⁿ'yo' nnoom. Ndo' wjaach'eeⁿ na ljo' hasta na nncue'ntyjo xuee na nncwjee'nnda' Jesucristo na nntu'xeⁿndye nn'aⁿ. Quia jo' nleitquioo' na tatjaa'naⁿ jnaⁿ cwicwila'xmaⁿ'yo'. ⁹ Ty'oots'om ñequii'cheⁿ matseicañaⁿ ñ'oom na jnda tjoom'm na cjoom'm, ndo' manquiityeeⁿ jnda tqueeⁿñê 'o na calajomndyō' ñequio Jnaaⁿ Jesucristo na cwiluiñê na matsaⁿ'ntjom jaa.

Nn'aⁿ tsjoom Corinto na cwila'yu' titjoom' m'aⁿna

¹⁰ 'O nn'aⁿya na cwila'yu'yo' ñequio Jesucristo na cwiluiñê na matsaⁿ'ntjoom jaa, ñequio najndei na cwiluiñê matseity'oondyō ndaaⁿ'yo' na c'om'yo' na tjoom' m'aⁿ'yo' ñequio nc'iaa'yo' na cwila'yu', tanc'om'yo' na meiⁿtoⁿ ñ'eⁿndyena. C'om'yo' na ñecwiixjeⁿ nquiu'yo' ñ'eⁿndyena. ¹¹ Luaa' matsjoo ndaaⁿ'yo' 'o nn'aⁿya ee joo nn'aⁿ waa' Cloé jnda jluena noⁿ'ya na m'aⁿ'ntiaa'ndyō' ñequio ntyjee'yo' na cwilayu'. ¹² Luaa waa na ñe'catsjoo cantyja 'naaⁿ' ñ'oomwaa', ñ'eeⁿ'ndyō' 'o na

cwindu'yo': "Ja matseijomndyo cantyja 'naa' Pablo"; nt'omndyo' 'o: "Ja ñ'e' Apolos"; ndo' nt'omndyo': "Ja ñ'e' Pedro"; ndo' nt'omndyo': "Ja ñ'e' Cristo". ¹³ ¿Aa nts'aache'na' na maton'ne Cristo? Ndo' ja Pablo, ¿aa ty'iroom nn'a' ja ts'oom'naa' cwenta'yo'? Oo, ¿aa ñequio xueeya teits'oomndyo'? ¹⁴ Quianl'uaa' Ty'oots'om na macanda Crispo ñ'e' Gayo na seits'oomndyo, tjaa'na' nt'omndyo' 'o na seits'oomndyo, ¹⁵ cha tjaa 'ñee' ndaa nntso na ñequio xueeya seits'oomndyo jom. ¹⁶ Ndo' je' macjaañjoom' ts'oq' na mati seits'oomndyo Estéfanos ñequio nn'a' wa'a'. Mei' tileicjaañjoom'ti ts'oq' aa m'a' nt'omndyo' 'o na seits'oomndyo. ¹⁷ Ee nchii ty'iom Cristo ts'iaa' ja na catseits'oomndyo nn'a'. Jñoom ja na catseicandiiya nn'a' na macwji'n'maa'ñê añmaa'na, mei' nchii nts'aaya ts'iaa'ñee' ñequio ñ'oom na jndo' n'om nn'a', ee xe' naljo', juu ñ'oom cantyja 'naa' na ty'iroom nn'a' jom ts'oom'naa', tjaa'na' najndeii na matseixma'na'.

Cristo cwiluiñê najndeii Ty'oots'om ñequio na jndo' ts'om

¹⁸ Ndaa nn'a' na cwi'ootsuundye añmaa', juu ñ'oom na ty'iroom nn'a' Cristo ts'oom'naa', nquiuna ticajndana', saa jo ndaa jaa na matsaacadui'n'maa'ndyo, tseixma'na' ñ'oom najndeii cantyja 'naa' Ty'oots'om. ¹⁹ Cha'xe' matseicandii ñ'oom'm na teiljeii:

Nn'a' na jee' jndye nquiu,

nnts'aa na catyuii' na jndo' n'omna,

ndo' juu na jee' cwila'no'na, nnts'aa na cwe' ts'iaa'ndyo juu jo'.

²⁰ Nc'e luaa' tso ljeiiñee', ¿yuu l'ueñe ts'a' na jee' jndo' ts'om ndo' mati ts'a' na jndye matseinaa' ndo' ñequio ts'a' na jee' ya matseitjoom' ñ'oom? Ee jnda tque' Ty'oots'om cha'tso na jndo' n'om nn'a', cwe' ts'iaa'ndyo joona'. ²¹ Nc'e na jndo' ts'om Ty'oots'om, sei'noo' na nquiee nn'a' tsjoomnancue tixocata'jnaa'na jom cantyja 'naa' na jndo' n'omna, jo' chii majaawee' ts'oom na nncwji'n'maa'ñê añmaa' nn'a' cwe' cantyja 'naa' ñ'oom'm na cwiñequia nn'a', meii' cwitjeii'na cwenta na juuna' ñ'oom na ticajnda tseixma'na'.

²² Nn'a' judíos cwita'na na nnty'iaandaana cwii ts'iaa' t'ma' na tixocaluiina' na cwe' najndeii nquii ts'a' cha nla'yu'na. Saa nn'a' na nchii judíos, joona cwil'uee'ndyena ñ'oom na nntseijndo'tina' n'omna cha na nla'yu'na, ²³ saa já cwiñequiaayâ ñ'oom na ty'iroom nn'a' Cristo ts'oom'naa'. Ñ'oom'ñee' tia nquiu nn'a' judíos ndo' nn'a' na nchii judíos cwitjeii'na cwenta na jee' cje tseixma'na'. ²⁴ Ndo' cantyja 'naa' nn'a' na ma'ma' Ty'oots'om, meii' nn'a' judíos oo meii' nn'a' nt'omche' tsjaa', macwji'n'maa'ñê nn'a', ndo' na cwiluiñê na jndo' ts'oom. ²⁵ Ee juu na ndoo' nquiu nn'a' na tseixma'na' na tixcwe mach'ee Ty'oots'om jndo'ti ts'oom na luaa' mach'ee', nchiiti juu na jndo' n'om nn'a', ndo' juu na cwitjeii'na cwenta na tijnei' na tquiaa' na luaa' tjom Cristo, juu jo' ma'mo'na' na jndeiiyee', nchiiti cha'tso najnda na la'xma' nn'a'.

²⁶ 'O nn'aⁿya na cwila'yu'yo', queⁿyo' cwentā na ma'maⁿ Ty'o^ots'om 'o meiⁿ tijndyendyo' cwtijeii' nn'aⁿ cwentā na la'xmaⁿ'yo' nn'aⁿ na jndō' n'om, tijndyendyo' cwiluiindyo' nn'aⁿ na t'maⁿ cwiluiindye, tijndyendyo' tuiindyo' nda nn'aⁿ na tyandye. ²⁷ Ee macwjii'ñe Ty'o^ots'om nn'aⁿ cwentaaⁿ'aⁿ na tijndō' n'om cha catseijnāaⁿ'na' nn'aⁿ na ndoo' nquiuna na jndō' n'om nquieena. Ndo' macwjii'ñê cwentaaⁿ'aⁿ nn'aⁿ na tit'maⁿ cwiluiindye cha cantseijnāaⁿ'na' nn'aⁿ na waa na jnda la'xmaⁿ. ²⁸ Quii'ntaaⁿ nn'aⁿ tsjoomnancue macwjii'ñê nn'aⁿ cwentaaⁿ'aⁿ na cje la'xmaⁿ, macwjii'ñê nn'aⁿ na ticuee' n'om nt'omcheⁿ nn'aⁿ, nn'aⁿ na cwtijeii' nt'omcheⁿ cwentā na tjaa yuu l'uendye. Nmeiiⁿ mach'eeⁿ cha' m'mōⁿ'na' na joo nn'aⁿ na nquiu na t'maⁿ la'xmaⁿ ticjaaquiee' cantyja 'naaⁿ'na. ²⁹ Cha'tso nmeiⁿ mach'eeⁿ cha meiⁿcwii ts'aⁿ tincwji's'añe tincwji'scuñe cheⁿnquii jo nnoom. ³⁰ Manquiiⁿtyeeⁿ jnda s'aaⁿ na tjoom' cwiluiindyo' cantyja 'naaⁿ' Cristo Jesús, ndo' cantyja 'naaⁿ' jom cwicanda'yo' na jndō' n'om'yo', ndo' na m'aⁿ'yo' na tjaa jna' cwila'xmaⁿ'yo', ndo' na maqueⁿñōōⁿ 'o na lju' n'om'yo' jo nnoom, ndo' na cwilui'n'maaⁿndyo'. ³¹ Cha'xjeⁿ na matseicandii ñ'oom'm na teiljeii: "Xeⁿ na m'aaⁿ ts'aⁿ na ñe'catseis'aañe cheⁿnquii, cwji's'aaⁿ Ty'o^ots'om cantyja na mach'ee ñ'eⁿñê."

Cristo jñoom ts'oom'naaⁿ

2 ¹ Saa 'o nn'aⁿya na cwila'yu'yo', quia tuācañōōⁿya 'o na ñnequiaya ñ'oom na mayuu' na ticaliu nn'aⁿ cantyja 'naaⁿ' Ty'o^ots'om, nchii seinaⁿya ndaaⁿ'yo' ñ'oom na jndō' n'om nn'aⁿ meiⁿ nchii ñ'oom na jeeⁿ ca'naaⁿ' na cwila'neiⁿ nn'aⁿ na jndye ñ'oom nquiu. ² Xjeⁿñeeⁿ tyeⁿ tyom'aaⁿ ts'oōⁿ na ñe'cwii ñ'oom na ñnequiaya ndaaⁿ'yo', ndo' cantyja 'naaⁿ' nquii Jesucristo, saa ñequii'cheⁿ cantyja 'naaⁿ' na ty'ioom nn'aⁿ jom ts'oom'naaⁿ. ³ Ñet'oōⁿya quii'ntaaⁿ'yo' na tijndō, tyoteindyo na tyocat'ua na aa nncjaacañjoom' ts'iaaⁿ na nnts'aa. ⁴ Saa quia tyoñequiaya ñ'oom' Ty'o^ots'om ndaaⁿ'yo', nchii seinaⁿ ñ'oom na cwila'neiⁿ nn'aⁿ na jeeⁿ jndō' n'om, tquioo' na nquii Espíritu ñequio najndeii na matseixmaaⁿ teil'uee'ñê ñ'oom'ñeeⁿ. ⁵ Luaa' tuui cha juu na cwila'yu'ya n'om'yo' c'oomna' cantyja 'naaⁿ' najndeii na matseixmaⁿ Ty'o^ots'om, nchii cwe' nc'e juu na jndō' n'om nn'aⁿ.

Nc'e Espíritu Santo, cwijaantyjoō' n'om nn'aⁿ cantyja 'naaⁿ' Ty'o^ots'om

⁶ Saa jo ndaaⁿ nn'aⁿ na queeⁿ n'om na cwila'yu'ya n'om, cwilanaaⁿyâ ñ'oom na jndō n'oōⁿyâ, saa juuna' titseijomna' cha'na juu na jndō' n'om nn'aⁿ tsjoomnancue, meiⁿ nchii cha'na ñ'oom na jndō' n'om nn'aⁿ na la'xmaⁿ n'iaaⁿ, na juu jo' wjaantycwii cantyja 'naaⁿ'na. ⁷ Ee jâ cwilanaaⁿyâ ñ'oom na jndō' ts'om Ty'o^ots'om. Teiyoticheⁿ wanty'iuu' tyom'aaⁿ ñ'oom'ñeeⁿ ee tyoowe'ntyjo xjeⁿ na ntyjeeⁿ na caliu nn'aⁿ

juuna'. Ee cwitjoocheⁿ na nlqueeⁿ tsjoomnancue saa jnda seijndaa'ñê na nnto'ñooⁿya na nlui'n'maaⁿndyo. ⁸ Nquiee nn'aⁿ na cwiluiindyê n'iaaⁿ tsjoomnancue tîcala'noⁿna cantyja 'naaⁿ na luaa' seijndaa'ñê Ty'ooots'om. Ee xeⁿ jla'noⁿna na Jesús cwiluiñê nquii na matsa'ntjom yuu na tjacantya na jeeⁿ nei'ncoo', quia jo' tîxocaty'ioomna jom ts'oom'naaⁿ. ⁹ Na'ñeeⁿ tjoomna cha'xeⁿ na matseineiⁿ ñ'oom' Ty'ooots'om na teiljeii. Matsona':

Joo nn'aⁿ na jnda nquii Ty'ooots'om,

jnda seijndaa'ñê jndye nnom cwentaana na tjacantya na ya na meiⁿjom tyoonty'iaa nn'aⁿ.

Meiⁿ tyoondyena cantyja 'naaⁿ joo jo',

majndeiticheⁿ na nnc'oom' n'omna chiuu la'xmaⁿna'.

¹⁰ Nquii Espíritu Santo t'mooⁿ ñ'oommeiⁿ ndaaya, ee jom mal'uetcuuñê cha'tso, hasta ñ'oom na t'maⁿti na matsei'noⁿ nquii Ty'ooots'om.

¹¹ Cantyja 'naaⁿ ts'aⁿ, ñ'ñeeⁿ nntsei'noⁿ chiuu m'aaⁿ ts'om cwiicheⁿ ts'aⁿ? Macanda nquii ntyjii. Maluaa' waa cantyja 'naaⁿ Ty'ooots'om, macanda nquii Espíritu na cwiluiñê ntyjii chiuu m'aaⁿ ts'oom. ¹² Jaa tyooto'ñooⁿya juu na m'aaⁿ n'om nn'aⁿ na tyoola'xmaⁿna cantyja 'naaⁿ Ty'ooots'om. Jaa cwito'ñooⁿya Espíritu na mañequiaaⁿ cha ndaa nla'noⁿa cha'tso na cwe'yu na mañequiaaⁿ na cwicandaaya. ¹³ Quia cwilanaaⁿya cantyja 'naaⁿ ñ'oommeiⁿ, cwiwil'uee'ndyô ñ'oom na ma'moⁿ Espíritu ndaayâ, nqueⁿ na cwiluiñê Ty'ooots'om, nchii ñequio ñ'oom na cwit'mooⁿ nn'aⁿ cantyja na jndo' n'om nquiee. Ndo' na luaa', cwiwil'uee'ndyô ñ'oom na matseijndaa'ñê Espíritu na cwit'mooⁿya ndaa nn'aⁿ na la'xmaⁿna jom.

¹⁴ Saa ts'aⁿ na ticaluiñê cwentaa' Ty'ooots'om titseiñ'oom'ñê ñ'oom na matseijndaa'ñê Espíritu na cwiluiñê ee ndoo' ntyjii tsaⁿñeeⁿ na cwe' ñ'oom na til'ue joona'. Ee manda ts'aⁿ na matseixmaⁿ cantyja 'naaⁿ Espíritu, juu ndaa nntsei'noⁿ. ¹⁵ Saa ts'aⁿ na matseixmaⁿ Espíritu ndaa nntsei'noⁿ ñ'oommeiⁿ, meiⁿ tjaa 'ñeeⁿ ts'aⁿ na wanaaⁿ na nntso na tixcwe mach'eeⁿ. ¹⁶ Ee ñ'oom' Ty'ooots'om na teiljeii matsona': “ñ'ñeeⁿ ts'aⁿ jnda sei'noⁿ chiuu na m'aaⁿ ts'om Nquii na cwiluiñê na matsa'ntjom jaa? ñ'ñeeⁿ ts'aⁿ ndaa nntseijndo' ts'oom?” Saa jaa laxmaaⁿya juu na m'aaⁿ ts'om Cristo.

Cwiluiindyô nn'aⁿ na cwila'x'iaa'ndye ñ'eⁿ Ty'ooots'om

3 ¹ Cantyja 'naⁿya, 'o nn'aⁿya na cwila'yu'yo', tîcandaa nntseinaⁿya ñ'oom cantyja 'naaⁿ Cristo ndaa'yo' cha'xeⁿ na ma'moⁿ ts'aⁿ juuna' ndaa nn'aⁿ na la'xmaⁿ Espíritu. Tcaⁿna' na nntseinaⁿya juuna' ndaa'yo' na cha'cwijom cwiluiindyô' cantyja 'naaⁿ tsjoomnancue, cha'cwijom ndaa yonch'uu. ² Ee yo'ndaa tileicandaa nntquiina sei'. Joona macanda ndaatsu' tsondyeena cwiwena. Maluaa' matseijomna' cantyja 'naⁿ 'o. 'O tileicala'noⁿyo' ñ'oom' Ty'ooots'om na jndei'tina', ee

tyooquiee n'om'yo' cantyja 'naaⁿ'aⁿ. Ndo' meiⁿ je' tileicala'noⁿ'yo' ñ'oom'm na jndei'tina'. ³ 'O ndicwaⁿ la'xmaⁿ'yo' cantyja 'naaⁿ' tsjoomnancue. Ee na cwila'taa' n'om'yo' nc'iaa'yo' ndo' cwila'ntja'ndyo' ñ'eⁿndyena, ma'moⁿ'na' na tjaa na matseichuii'na' 'o ñequio nn'aⁿ na la'xmaⁿ cantyja 'naaⁿ'na'. ⁴ Ee quia cwiindyō' 'o nntso: “Ja matseijomndyō cantyja 'naaⁿ' Pablo”, ndo' cwiicheⁿ nntso: “Ja matseijomndyō cantyja 'naaⁿ' Apolos”, ma'moⁿ'na' na la'xmaⁿ'yo' cha'xjeⁿ nn'aⁿ tsjoomnancue.

⁵ Ja Pablo ¿ñeeⁿ cwiluiindyō? Ndo' ¿ñeeⁿ cwiluiñe Apolos? Ñequii'cheⁿ cwiluiindyō nn'aⁿ na cwindyā'ntjōō'yâ nnom Jesucristo na cantyja 'naaⁿ'yâ jla'yū'yo' ñ'eⁿñê. Cwii cwiindyō ñel'aayâ ts'iaaⁿ na tqiaaⁿ ndaayâ. ⁶ Ts'iaaⁿ na s'aa matseijomna' cha'cwijom ts'aⁿ na manom'. Ndo' ts'iaaⁿ na s'aa Apolos matseijomna' cha'cwijom ts'aⁿ na matseicandaa' ntjom. Saa nquii Ty'oōts'om mach'eeⁿ na tjaanajndei ts'iaaⁿñeeⁿ. ⁷ Ndo' na luaa', meiⁿ juu ts'aⁿ na manom' tit'maⁿ cwiluiñe, meiⁿ ts'aⁿ na matseicandaa'. Nquii Ty'oōts'om t'maⁿ cwiluiñê ee jom mach'eeⁿ na wjaanajndei ts'iaaⁿñeeⁿ. ⁸ Juu ts'aⁿ na manom' ñequio ts'aⁿ na matseicandaa', ñe'cwii xjeⁿ cwiluiindyena. Ndo' nquii Ty'oōts'om nntioml'uaaⁿ ts'aⁿ cantyjati na jnda ñejndi'ntjom nnoom. ⁹ Ee jâ cwe' cwila'xmaaⁿ'yâ nn'aⁿ na cwilajomndyō ts'iaaⁿ 'naaⁿ' Ty'oōts'om, ndo' 'o la'xmaⁿ'yo' tyuaaⁿ'aⁿ, la'xmaⁿ'yo' cha'cwijom w'aa na mach'eeⁿ.

¹⁰ Cantyja 'naaⁿ'na', ja cwiluiindyō cha'cwijom luañetquiee na seijndaa'ñe Ty'oōts'om na maquaⁿ tsiaⁿ'tsjō' ndo' cwiicheⁿ ts'aⁿ matseicandaa'ñe w'aa nacjoo' juuna'. Saa cwii cwii ts'aⁿ queⁿñe cwenta cantyja 'naaⁿ' ts'iaaⁿ na mach'ee. ¹¹ Ee tjaa 'ñeeⁿ ts'aⁿ na ndaa nlqueⁿndyō cwiicheⁿ ts'iaaⁿ'tsjō' ñequio tsiaⁿ'tsjō' na waa, na juu jo' tseixmaⁿ'na' Jesucristo. ¹² Saa tiñe'cwii nnom 'naⁿ na cwileil'uee'ndye nn'aⁿ na cwil'a ts'iaaⁿ nacjoo' tsiaⁿ'tsjō'ñeeⁿ. Ee ts'aⁿ na xcwee'ya ts'om na mandi'ntjom nnom Ty'oōts'om, matseijomna' ts'iaaⁿ na mach'eeⁿ cha'cwijom cwii w'aa na cwiluiina' ñ'eⁿ s'om cajaⁿ, oo ñ'eⁿ s'om xuee, oo ñ'eⁿ ljo' na jeeⁿ jnda. Saa ts'aⁿ na tixcwee' ts'om na mandi'ntjom nnom Ty'oōts'om, matseijomna' ts'iaaⁿ na mach'eeⁿ cha'cwijom cwii w'aa na cwiluiina' ñ'eⁿ n'oom, oo ñ'eⁿ neiiⁿ'jnda, oo ñ'eⁿ n'oomljooto'.

¹³ Juu xuee quia na nncu'xeⁿ Ty'oōts'om nn'aⁿ, nleitquioo'ya chiuu tseixmaⁿ ts'iaaⁿ na tyoch'ee cwii cwii ts'aⁿ. Juu xuee'ñeeⁿ t'maⁿ chom nncuaa, jo' jo' m'moōⁿ'na' chiuu tseixmaⁿ ts'iaaⁿ na tyoch'ee cwii cwii ts'aⁿ. ¹⁴ Jo' chii xeⁿ tilco ts'iaaⁿ na tyoch'ee ts'aⁿ, waa naya na nlo'ñoom cantyja 'naaⁿ' ts'iaaⁿ na jnda ñes'aaⁿ. ¹⁵ Saa xeⁿ nlco ts'iaaⁿñeeⁿ, nntsuuñê cantyja 'naaⁿ' juuna'. Nqueⁿ nlui'n'maaⁿñê, saa cwe' ñetomti jo'. Ndo' na luaa' nntjoom nntseijomna' cantyja 'naaⁿ'aⁿ cha'cwijom na nc'uaa' chii jluii'ñê naquii' chom.

¹⁶ ¿Aa ticaliu'yo' na 'o cwiluiindyō' waa' Ty'oōts'om ndo' na m'aaⁿ Espíritu Santo naquii' n'om'yo'? ¹⁷ Xeⁿ na m'aaⁿ 'ñeeⁿ juu na nntseityuii'

waa' Ty'oots'om, nntseityueeⁿeⁿ tsaⁿñeeⁿ ee lju' cwiluiiñe juuna', ndo' mancjo'yo' cwiluiindy'o' w'aa'ñeeⁿ.

¹⁸ Meiⁿcwiindy'o' 'o tinquiu'nn'aⁿñe cheⁿnquii cantyja 'naaⁿ ñ'oomwaa'. Xeⁿ m'aaⁿ 'ñeeⁿ ts'aⁿ quii'ntaaⁿyo' na matseituu na jndo' ts'om cha'xeⁿ nquiee nn'aⁿ tsjoomanancue cwitjeii'na cwentā, c'oom juu cha'na ts'aⁿ na meiⁿchjoo tijndo' ts'om, cha mayuu'cheⁿ nntseixmaaⁿ ts'aⁿ na jndo' ts'om. ¹⁹ Ee juu na cwitjeii' nn'aⁿ tsjoomnancue cwentā na jndo' n'omna, Ty'oots'om macwjeeⁿeⁿ cwentā na ntjeiⁿ jo'. Ee waa ñ'oom'm na teiljeiina' na matsona': "Nnt'uii Ty'oots'om nn'aⁿ ñequio mañejuu na jndo' n'omna". ²⁰ Ndo' waa cwiicheⁿ ñ'oom'm na teiljeii na matsona': "Nqueⁿ na cwiluiiñe na catsaⁿntjoom jaa mantyjeeⁿ joo ñomtiuu 'naaⁿ nn'aⁿ na jeeⁿ jndo' n'om, cwe' ts'iaaⁿndyo joona'." ²¹ Nc'e na ljo', tintjei's'andyo' na majndaa' ts'aⁿ na cwilajomndyo' ñ'eⁿñe. Ee cha'tso na matseijndaa'ñe Ty'oots'om la'xmaⁿna' cwentā'yo'. ²² Meiiⁿ nncō Pablo, oo nquii Apolos, oo nquii Pedro, cha'tsondyō cwiluiindyō na cwindyaⁿntjooⁿyā ndaa'yo'. Ee cha'tso na s'aa Ty'oots'om m'aaⁿna' cwentāya. Cantyja na cwitandoo'a tsjoomnancuewaañe matseixmaⁿna' naya 'naaⁿya ee na cwito'ñooⁿya na cwitandoo'a ñ'eⁿñe. Mati cantyja na cwiwjaaya matseixmaⁿna' naya 'naaⁿya, nc'e cantyja 'naaⁿ jo' cwitsaaquiaa'a cañoom'luee. Cha'tso na cwiwinooⁿya je' ñequio na quia wjaawe'cañoomna' cwila'xmaⁿna' na nnteijndeiina' jaa. ²³ Ndo' 'o m'aⁿyo' cwentāa' Cristo ndo' jom cwiluiiñe cwentāa' Ty'oots'om.

Ts'iaaⁿ na maty'iom Jesucristo apóstoles

4 ¹ Jo' chii catjei'yo' cwentā cantyja 'naaⁿyā na cwiluiindyō nn'aⁿ na cwindye'ntjom nnom Cristo, ndo' na cwit'mooⁿyā ndaa' nn'aⁿ ñ'oom' Ty'oots'om na wanty'iuu' tyom'aⁿna'. ² Juu ts'aⁿ na waa cwii ts'iaaⁿ na matseixmaⁿ, macaⁿna' na cwitquioo' cantyja 'naaⁿaⁿ na cwiluiiñe ts'aⁿ na matseicanda. ³ Saa cantyja 'naⁿya, ticwjaa'ndyo cwentā chiuu waa na 'o cwitjei'yo' cwentā cantyja 'naaⁿ ts'iaaⁿ na matseixmaⁿya oo chiuu nquii nt'omcheⁿ. Meiⁿ ticu'xaⁿ cheⁿnncō cantyja 'naⁿya. ⁴ Juu na m'aaⁿ ts'ooⁿ tica'moⁿna' aa waa na matseitjoondyo, saa meiiⁿ na ljo' tica'moⁿna' na tjaa jnaⁿya. Nquii Ty'oots'om nncu'xeeⁿ ja. ⁵ Nc'e na luaa', cwitjoocheⁿ na nncwjee'nda' Ta Jesús, tintjei'yo' cwentā cantyja 'naaⁿ nn'aⁿ na cwindye'ntjom ndaa'yo'. Ee xjeⁿñeeⁿ nnts'aaⁿ na nleitquioo'ya 'naⁿ na cwe' wanty'iuu' cwil'a nn'aⁿ ñequio joo 'naⁿ na cwila'jndaa'ndyena naquii' n'omna. Quia jo' ñnequiaa Ty'oots'om nnom cwii cwii ts'aⁿ cha'xeⁿ na matsona'.

⁶ 'O nn'aⁿya na cwila'yu'yo', matseinaⁿya ñ'oommeiⁿ ndaa'yo' cantyja 'naⁿya ñ'eⁿ Apolos cha nnteijndeiina' 'o, ndo' cha cantyja 'naaⁿyā nntsaala'noⁿyo' na tincwinom'yo' ñ'oom na teiljeii, ndo' cha meiⁿcwii ts'aⁿ tincwji's'aaⁿ cwii ts'aⁿ na mañequiaa ñ'oom' Ty'oots'om cha nnts'aana' na ticwentyjo 'naaⁿ cwiicheⁿ. ⁷ Ee ÷chiuu waa cantyja 'naⁿ

na mach'eena' ntyji' na jndandyu'ti' nchiiti cwiicheⁿ? Ndo' ícwaaⁿ cwii nnom na matsei'xmaⁿ na nchii nquii Ty'ooots'om mañequiaaⁿ na matsei'xmaⁿ jo'? Ndo' xeⁿ cwe' jnda' naya'ñeeⁿ, íchiiu na matseis'andyu' na cha'cwijom tiyuu' na jnda' juuna'?

⁸ Mach'eena' na nquiu'yo' na la'xmaⁿ'yo' nn'aⁿ na tyandye. Cha'cwijom tjaa meiⁿcwii na macaⁿtina' 'o. Cha'cwijom na cwiluiindy^o nn'aⁿ na cwitsaⁿntjom, meiiⁿ na ticañ'aaⁿyâ. Toom cwe' na mayuu' cwiluiindy^o nn'aⁿ na cwitsaⁿntjom cha mati jâ nla'jomndyô jo' ñ'eⁿndyo'. ⁹ Mach'eena' ntyjii na maqueⁿ Ty'ooots'om jâ apóstoles na wanty'iaa'ndyotyayâ na cha'tsondye nn'aⁿ. Matseijomna' cantyja 'naa'yâ cha'cwijom nn'aⁿ na jnda teijndaa' na nncwje na jndoo'cheⁿ nn'aⁿ ndo' nnty'iaa ángeles. ¹⁰ Cwitjeii' nn'aⁿ cwent^a na jâ na cwiñequiaayâ ñ'oom cantyja 'naaⁿ Cristo la'xmaaⁿyâ nn'aⁿ na ntjeiⁿndye saa 'o cwitjei' cheⁿncjo'yo' cwent^a na la'xmaⁿ'yo' na jeeⁿ jndo' n'om'yo' cantyja 'naaⁿaⁿ. Cwitjei'yo' cwent^a na tileicjaanjoom' cwil'aayâ saa 'o jeeⁿ cwijaanjoom' cwil'a'yo'. Cwila't'maaⁿndye nn'aⁿ 'o saa jâ ticuee' n'omna. ¹¹ Hasta xjeⁿ je', waa xjeⁿ na matseitjoona' na nntquiaayâ ndo' na nncwaaⁿyâ ñequio liaa na nlcwaaⁿâ. Jndye ndii' cwicachooⁿâ, ndo' meiⁿ tjaa'naⁿ w'aaya. ¹² Cwiwijndyaayâ na cwil'aayâ ts'iaaⁿ. Quia cwitioo nn'aⁿ ñ'oomwi' cjooyâ, cwitaaⁿyâ na catio'naaⁿñe Ty'ooots'om joona. Quia cwileintyjona jâ, cwila'quii n'ooⁿyâ. ¹³ Quia cwila'neiⁿ nn'aⁿ ñ'om taa' ts'om nacjooyâ, cwila'joom'na jâ cha'cwijom to' na niom nnom tsjoomnancue saa cwit'ooⁿyâ ñequio ñ'oom ya. Hasta xjeⁿ je' cwil'a nn'aⁿ na cwila'xmaaⁿyâ cwii na jeeⁿ ts'iaaⁿ.

¹⁴ Nchii cwe' matseiljeiya ñ'oommeiⁿ cha catseijnaaⁿna 'o saa cha na nntseijndo'na' n'om'yo' nc'e na cwiluiindy^o ntseindaaya na jeeⁿ wi' ts'ooⁿya 'o. ¹⁵ Ee meiⁿ na aa m'aⁿ qui meiⁿ nn'aⁿ na cwit'mooⁿna cantyja 'naaⁿ Cristo ndaa'yo', saa tijndye lotye'yo' m'aⁿ. Cantyja 'naaⁿ na cwila'yuy^a n'om'yo' ñ'eⁿ Ty'ooots'om, ja cwiluiindy^o tsotye'yo' nc'e ñ'oom naya na macwji'n'maaⁿñê nn'aⁿ. ¹⁶ Jo' chii matseijndo'a n'om'yo', cal'a'yo' cha'xjeⁿ na quits'aaya.

¹⁷ Jo' chii majñoⁿya Timoteo na m'aⁿ'yo', cwiluiiñê jndaaya na jeeⁿ matseicañaⁿ ndo' na jnda ntyjiiya jom, jom nnts'aaⁿ na nncjaañjoom' n'om'yo' chiiu waa na jom'aaⁿ na matseixmaⁿya cwentaa' Cristo Jesús cha'xjeⁿ na ma'mooⁿ ndaa nn'aⁿ cwii cwii tmaaⁿ nn'aⁿ na macwjeeⁿeⁿ cwentaaⁿaⁿ. ¹⁸ Ñ'eeⁿndyo' 'o na cwilas'andyo' cheⁿncjo'yo' na cwindu'yo' na tixocjonty'iannda'a 'o. ¹⁹ Saa tyuaa' nncjocandoo'a 'o xeⁿ l'ue ts'om Ta Jesús, ndo' quia ljo'cheⁿ nljeiya chiiu n'om naⁿñeeⁿ na luaa' cwil'ana, nljeiya chiiu tseixmaⁿ ñ'oom na cwila's'andyena. ²⁰ Ee juu na ma'moⁿna' na matseixmaⁿ ts'aⁿ na matsaⁿntjom Ty'ooots'om jom, xocwitquioo' jo' cwe' nc'e ñ'oom na matseineiⁿ ts'aⁿ, nleitquioo' jo' cantyja 'naaⁿ na aa matseixmaaⁿ najndeiⁿ na cwiluiiñe Ty'ooots'om.

²¹ ¿Chiuu nl'ue n'om'yo' na cats'aa? ¿Aa nncjocandoo'a 'o na nntseitia'a 'o, oo aa nnc'ooⁿya na wi' ts'ooⁿya 'o, ñequio na jeeⁿ jnda ntyjiiya 'o?

Catjei'yo' ts'aⁿ na m'aaⁿya ñ'eⁿ cwiicheⁿ yuscu

5 ¹ Waa ñ'oom na cwiindyo' 'o mañ'oom tsondyee t'maⁿ ndo' na ljo' meiⁿ nn'aⁿ na tyoola't'maaⁿndye Ty'oots'om tiquil'ana na luaa'. ² Ndo' 'o cwiitjei' cheⁿncjo'yo' cwenta na jeeⁿ cwila'candaaⁿndyo' meiⁿ tatiato nquiu'yo' na luaa' waa. Matsona' na catjei'yo' tsaⁿñeeⁿ quii'ntaaⁿyo' na luaa' mach'eeⁿ. ³ Meiiⁿ na tic'ooⁿndyo ñ'eⁿndyo', saa cantyja 'naaⁿ espíritu 'naⁿya m'aaⁿya ñ'eⁿndyo', ñequio xuee' Ta Jesucristo jnda tu'xaⁿya ts'aⁿ na luaa' mach'ee. ⁴ Quia cwiitjomndyo' na nla't'maaⁿndyo' Ty'oots'om ja nnc'ooⁿya ñ'eⁿndyo' cwe' cantyja 'naaⁿ espíritu 'naⁿya ndo' mati ñequio juu najndei na matseixmaⁿ Ta Jesús nnc'oomna' ñ'eⁿndyo'. ⁵ Ndo' na luaa', la'xmaⁿyo' na catio'yo' tsaⁿñeeⁿ l'o Satanás cha cwi'ndaa' seiiⁿeⁿ saa nlui'n'maaⁿñe espíritu 'naaⁿaⁿ quia na nncwjee'nnda' Ta Jesús.

⁶ Tixcwe na cwiitjei'yo' cwenta na jeeⁿ cwila'candaaⁿndyo' jo nnom Ty'oots'om ndo' na cwiljoya n'om'yo' na luaa' waa quii'ntaaⁿyo'. ¿Aa ticaliu'yo' na meiiⁿ ñechjoowi' ndaaljo' matseicandei'na' cha'waa tsqueeⁿtyoo'? ⁷ Jo' chii catjei'ndyo' cantyja 'naaⁿ cha'tsoñ'eⁿ na la'xmaⁿna' ndaaljo' tquie na matsei'ndaa'na' 'o cha nntseijomna' 'o tyoo' na tuiina' ñ'eⁿ tsqueeⁿtyoo' xco na tjaa ndaaljo' tjaquiee' na cwicwa' nn'aⁿ judíos xuee Pascua, na juu tyoo'ñeeⁿ cwiluiindyo'. Ee Cristo cwiluiñê Catsmaⁿ chjoo cwentaaya cantyja 'naaⁿ xuee Pascua 'naaⁿya. Jla'cuee' nn'aⁿ jom ndo' tueeⁿeⁿ cwentaaya. ⁸ Jo' chii matsona' na calajomndyo xuee Pascua ñequio na xcwee' n'ooⁿya ndo' na mayuu'a, na joo jo' la'xmaⁿna' cha'cwijom tyoo' na tjaa ndaaljo' tjaquiee'. Nchii nlajomndyo xuee Pascua'ñeeⁿ ñequio ndaaljo' tquie na tseixmaⁿna' na quie' n'ooⁿya ndo' natia na cwil'aaya.

⁹ Ñequio cwiicheⁿ carta'ñeeⁿ tsjooya na tilajomndyo' ñequio nn'aⁿ na cwe' m'aⁿya ñequio nt'omcheⁿ nn'aⁿ. ¹⁰ Saa ñ'eⁿ carta'ñeeⁿ nchii ñe'catsjooya na catjei'ndyo'ñ'eⁿyo' ñequio nn'aⁿ tsjoomnancue na cwe' m'aⁿyana ñequio nn'aⁿ oo na m'aⁿna na cwila'queeⁿ n'omna 'naaⁿ cwiicheⁿ ts'aⁿ, oo na jeeⁿ ya cwinquio'nn'aⁿna nc'iaana cha nndaā ntjeii'na 'naaⁿ naⁿñeeⁿ oo ñ'eⁿ joo nn'aⁿ na cwila't'maaⁿndye 'naⁿ na cwe' nn'aⁿ l'a. Ee xeⁿ tilajomndyo' ñequio nn'aⁿ na laxmaⁿ nmeiⁿ, nlcaⁿna' na calui'yo' tsjoomnancue. ¹¹ Ñ'oom na l'ue ts'ooⁿ na cala'noⁿyo' cantyja 'naaⁿ carta'ñeeⁿ, ts'aⁿ na matso na matseyu' ñ'eⁿ Jesucristo, meiⁿchjoo tilajomndyo' ñ'eⁿñê xeⁿ m'aaⁿyaaⁿ ñ'eⁿ ts'aⁿ na cwe' luaa'ndyo', oo queeⁿ ts'oom 'naaⁿ cwiicheⁿ ts'aⁿ, oo matseit'maaⁿñê 'naⁿ na cwe' nn'aⁿ l'a, oo cantuñê, oo tsaⁿ candii jom, oo mach'ueeⁿ. Meiⁿ na nlcwa' ñequio ts'aⁿ na matseixmaⁿ nmeiⁿ til'a'yo'. ¹² Titseixmaⁿya na nncu'xaⁿya nn'aⁿ na tyoola'yu'. Ncjo'yo'

la'xmaⁿ'yo' na nntu'xeⁿ'yo' nn'aⁿ na m'aⁿ quii'ntaaⁿ'yo'. ¹³ Nquii Ty'o^ots'om nncu'xeeⁿ nn'aⁿ na tyoola'yu'. Quia jo' catjei'yo' ts'aⁿ jnaⁿñeeⁿ quii'ntaaⁿ'yo'.

Ticaty'iomyana' na nlquaaⁿya ñ'oom cjoo nc'iaaya

6 ¹ Quia cwiindyo' 'o waa ñ'oom na malein'oomna' juu ñequio cwiicheⁿ x'iaa' na matseyu', ÷chiiu na cwiqueⁿ'yo' ñ'oom tsaⁿñeeⁿ jo nnom jwe na nchii ts'aⁿ na matseyu'? Cwa nchii ncjo'yo' na cwila'yu'yo' ñ'eⁿ Ty'o^ots'om nla'jndaa'ndyo' ñ'oom'ñeeⁿ. ² ÷Aa ticaliu'yo' na joo nn'aⁿ na cwiluiindye cwentaa' Ty'o^ots'om nntu'xeⁿna nn'aⁿ tsjoomancue? Ndo' nc'e na nntu'xeⁿ'yo' nn'aⁿ tsjoomnancue, ÷chiiu na tileicandaaⁿ nntu'xeⁿ'yo' ñ'oommeiⁿ na cwe' cwantindyo joona'? ³ ÷Aa ticaliu'yo' na nntu'xaaⁿya ángeles? Ndo' nc'e na ljo', majndeiticheⁿ ndaaⁿ nla'jndaa'ndyo' ñ'oom na mat'uiina' jaa yuu na ticjaañjoom' na cwil'aaya je'. ⁴ Jo' chii xeⁿ niom ñ'oom na maleichuuna' 'o ñequio nn'aⁿ'yo' na cwilayu', caty'iom'yo' ts'iaaⁿñeeⁿ nn'aⁿ quii'ntaaⁿ'yo' na tit'maⁿ la'xmaⁿ na catu'xeⁿna ñ'oom 'naⁿ'yo'. ⁵ Matsjoo na luaa' cha catseijnaaⁿ'na' o'. ÷Aa nnts'aacheⁿ'na' na tjaa'naⁿ meiⁿñecwii ts'aⁿ quii'ntaaⁿ'yo' na jndo' ts'om na nntseijndaa'ñê ñ'oom na maleichuuna' 'o? ⁶ ÷Aa maxjeⁿ maty'iomyana' na cwiqueⁿ'yo' ñ'oom cjoo' cwii nn'aⁿ'yo' na mati matseyu'? Jo' chii cwitjomndyo' jo ndaaⁿ nn'aⁿ na cwitu'xeⁿ ñ'oom, meiⁿ na joona nchii nn'aⁿ na cwila'yu'.

⁷ Juu na cwila'ntja'ndyo' ñequio nc'iaa'yo' na cwila'yu' ma'moⁿ'na' na t'maⁿ waa na cwila'tjo^ondyo'. Yati caljoya n'om'yo' nawi' na cwil'ana 'o, meiⁿ na cwinty'ueena 'naⁿ'yo'. ⁸ Saa 'o xuii' na cwil'a'yo', mancjoondyo' cwita'wi'yo' nn'aⁿ'yo' na cwila'yu' hasta cwinty'uee'yo' 'naaⁿ'na. ⁹ ÷Aa ticaliu'yo' na joo nn'aⁿ na cwiñequiandye cantyja 'naaⁿ natia ticalaxmaⁿna cantyja na matsaⁿntjom Ty'o^ots'om? Tiñe'quio'nn'aⁿndyo' cheⁿncjo'yo' cantyja 'naaⁿ ñ'oomwaañe. Nn'aⁿ na cwe' cwitjomndyeyana ñ'eⁿ nn'aⁿ na tyoo'uncona, tixocala'xmaⁿna cantyja na matsaⁿntjom Ty'o^ots'om, meiⁿ nn'aⁿ na cwila't'maaⁿndye 'naⁿ na cwe' nn'aⁿ l'a, meiⁿ nn'aⁿ na cwe' m'aⁿya ñ'eⁿ nn'aⁿ, meiⁿ naⁿnom na cwe' ñ'eⁿ ntyjenom m'aⁿ, ¹⁰ meiⁿ nn'aⁿ na cwinty'uee, meiⁿ nn'aⁿ na queeⁿ n'om 'naaⁿ cwiicheⁿ ts'aⁿ, meiⁿ naⁿcandyee, meiⁿ nn'aⁿ na cwitioñ'oom nn'aⁿ, meiⁿ nn'aⁿ na cwinquio'nn'aⁿ ts'aⁿ cha ndaaⁿ ntjeii'na 'naaⁿ'na. ¹¹ Ñ'eeⁿndyo' 'o na ñeja'xmaⁿ'yo' nmeiⁿ cwitjoocheⁿ na nla'yu'yo', saa je' jnda tmaⁿndyo', jnda tqueⁿndyo Ty'o^ots'om 'o, jnda tqueeⁿ 'o na tjaa jnaⁿ la'xmaⁿ'yo' ñequio xuee' Ta Jesucristo ndo' cantyja 'naaⁿ nquii Espíritu na cwiluiñe Ty'o^ots'om cwentaaaya.

Maqueⁿlju' Ty'o^ots'om seii' ts'aⁿ

¹² Waa ñ'oom na cwilue nn'aⁿ: “Wanaaⁿ na nnts'aa meiⁿljo'cheⁿ na l'ue ts'o^o”. Mayuu' na ljo', saa ticha'tso mateijndeina' ts'aⁿ. Ñ'oom na

mayuu' wanaaⁿ na nnts'aa yuu na l'ue ts'ooⁿ saa ticatsona' na cwii na mats'aa nlqueⁿna' xjeⁿ 'naaⁿna' ja. ¹³ Mati cwilue nn'aⁿ: “Juu nantquie tseixmaⁿna' cwentaa' tsiaa' ts'aⁿ, ndo' tsiaa' ts'aⁿ tseixmaⁿna' cwentaa nantquie.” Ñ'oom na mayuu' jo', saa we nnom nmeiⁿ nnts'aa Ty'oots'om na nndyuena'. Saa nchii tqueeⁿ seii' ts'aⁿ na cwe' luaa' nnc'oom ñ'eⁿ cwiicheⁿ ts'aⁿ, tqueeⁿ seii'a na laxmaⁿna' cwentaa' nqueⁿ na matsaⁿntjoom, ndo' jom m'aaⁿ cwentaa' seii'a. ¹⁴ Ndo' cha'xjeⁿ na tqiaaⁿ na wando'xco Jesús mati ñeiquiaaⁿ na nntandoⁿxcooya nc'e najndeii na cwiluiiñê.

¹⁵ ¿Aa ticaliu'yo' na juu seii'yo' laxmaⁿna' cwii taⁿ seii' Cristo? ¿Aa maty'iomna' na nntseitjooⁿa juuna' ñ'eⁿ cwii yuscu na cwe' luaa' m'aaⁿ ñ'eⁿ nn'aⁿ? Meiⁿchjoo ticaty'iomna' ¹⁶ ¿Aa ticala'noⁿyo' quia na matseitjoom'ñe ts'aⁿ ñequio sculjaa', ñe'cwii sei' laxmaⁿna? Ee ñ'oom Ty'oots'om na teiljeii matsona': “Wendye joona, ñe'cwii sei' la'xmaⁿna.” ¹⁷ Ndo' na luaa' waa, quia na matseijomñe ts'aⁿ ñequio Ta Jesús, ñe'cwii cwiluiiñe tsaⁿñeeⁿ ñ'eⁿñê.

¹⁸ Cha'cwijom na jndeii maleinom ts'aⁿ cha na ticat'uii cwii na teincuu' jom, maluaa' cal'a'yo' na tic'om'ya'yo' ñ'eⁿ ts'aⁿ na cwe' luaa'. Ee nt'omcheⁿ jnaⁿ na mach'ee ts'aⁿ ticat'uiina' seiiⁿeⁿ, saa ts'aⁿ na matseitjoom'ñe ñ'eⁿ cwiicheⁿ ts'aⁿ na cwe' luaa', matseicw'aa'ñê jnaⁿ seiiⁿeⁿ. ¹⁹ ¿Aa ticaliu'yo' na cwiluiiñe seii'yo' wats'om cwentaa' Espíritu Santo na m'aaⁿ quii' n'om'yo' na jnda tqiaa Ty'oots'om na c'oom ñ'eⁿndyo'? Jo' chii ticalaxmaⁿyo' na ñeiquiandyo' na nl'a seii'yo' yuu na queeⁿ n'omna'. ²⁰ Ee jnda seijnda Ty'oots'om 'o ñequio cwii na jeeⁿcheⁿ ndya' jnda. Jo' chii laxmaⁿyo' na cala't'maaⁿndyo' jom ñequio seii'yo' ñequio espíritu 'naⁿyo' ee na we ndii' joona' la'xmaⁿna' cwentaaⁿaⁿ.

Ñ'oom cantyja 'naaⁿ nn'aⁿ na jnda t'unco

7 ¹ Ndo' je' maw'o ñ'oom na cwita'x'e'yo' nooⁿ nacjoo' carta na jla'cwanom'yo'. Ñecuaa meiⁿ ticoco tsaⁿs'a, ² saa jnaaⁿ na jeeⁿ cwe' luaa' cwic'eeⁿ nn'aⁿ ñ'eⁿ nc'laana, jo' chii yati cwii cwii tsaⁿs'a cocoom ndo' mati cwii cwii tsaⁿscu c'oom saaⁿaⁿ. ³ Nquii tsaⁿs'a waa cwii nnom na matseixmaaⁿ na nnts'aaⁿ ñ'eⁿ scoom'm ndo' mati tsaⁿscu waa cwii nnom na matseixmaaⁿ na nnts'aaⁿ ñ'eⁿ saaⁿaⁿ. Wendyena quiandye ntyjeena ndaana na cala'candaⁿndyena ñ'oomwaa'. ⁴ Tsaⁿscu titseixmaaⁿ na nntseintycwii'ñê nnom saaⁿaⁿ ee saaⁿaⁿ tseixmaⁿ cwentaa jom, meiⁿ tsaⁿs'a titseixmaaⁿ na nntseintycwii'ñê nnom scoom'm ee scoom'm tseixmaⁿ cwentaa jom. ⁵ Cwe' jo' tintseintycwii'ñe ts'aⁿ nnom saaⁿaⁿ, nnom scoom'm saa ñequiicheⁿ wanaaⁿ na nla'ljondyo' xeⁿ waa ñ'oom na jnda t'maⁿyo' na ñe'calaneiⁿyo' nnom Ty'oots'om. Saa nchii na jndye xuee, tints'aana' na tileicala'quii n'om'yo' ndo' na ljo' nnts'aa Satanás na nla'tjoondyo'.

⁶ Luaa' waa na matsjoo cantyja 'naa' ñ'oomwaa', saa tintjei'yo' cwenta na tseixma'na' ñ'oom na matsa'ntjomna'. ⁷ Cantyja 'na'ya toom cwe' cha'tso na'nom laxma'na cha'na ja, saa tiñe'cwii xje' na mañequiaa Ty'ooots'om na laxmaa'ya. Ee ñ'ee' nn'a' waa cwii nnom na la'xma', ndo' nt'omche' cwiiche' ljo la'xma'.

⁸ Ndaa joo na'nom na tyoo'unco ndo' mati joo yolcu na jnda ljondye, matsjoo na yati caljoo'ndyena na ñenquieena cha'na m'aa' ja luaa'ne.

⁹ Saa xe' tileicwiqui n'omna na m'a' ñenquieena, ñecuaa, c'uncona, ee yati na m'aa' ts'a' na we ca', nchiiti na cwe' matseiquee' ts'oom na ñe'c'oom ñ'e' ts'a'.

¹⁰ Saa ndaa 'o na jnda tma'co'yo', luaa waa ñ'oom na matsa'ntjomna', nchii cwe' ñ'oom 'ndyo' ja, ñ'oom 'ndyoo nquii Ta Jesús jo': juu scuu' ts'a' ticato'ñê ñequio saa'a'. ¹¹ Saa xe' ma'ñee' saa'a', ticwanaa' na ncoconnaa'a', matsona' na caljoyaandyennda'na. Ndo' mati juu saa'a', tintseityuii' ljeii 'naa'na.

¹² Ndaa nt'omndyo' 'o na jnda t'unco'yo', luaa matsjoo nncō, nchii matsa'ntjom Ta Jesús na caluii na ljo', xe' na m'aa' ts'a' na matseiyu' saa scoom'm tyootseiyu' ndo' tsa'ñee' cwiljoya ts'om na m'aa' ñ'e'ñê, tinto'ñê ñequio scoom'm. ¹³ Ndo' cwii yuscu na matseiyu', xe' saa'a' tyootseiyu', saa cwiljoya ts'om na cwiljoo'ñe ñ'e'ñê, tintseityuee'e' ljeii na tocoom ñ'e'ñe. ¹⁴ Ee maque'ndyoo Ty'ooots'om saa' yuscu na tyootseiyu' nc'e na cwiluiñê saa' yuscu na matseiyu'. Ndo' mati maque'ñoo' scuu' ts'a' na tyootseiyu' nc'e saa'a' tseixma' ts'a' na matseiyu'. Ee xe' nchii na luaa' waa, quia jo' nda joona nla'xma' cha'na nda nn'a' na tyoola'yu', saa na mayuu' maque'na' nda joona cantyja 'naa' tmaa' cwentaa' Ty'ooots'om. ¹⁵ Saa xe' juu ts'a' na tyootseiyu' ñe'catseityuee'e' ljeii na tocoom ñ'e' saa'a' oo scoom'm, quia jo' ñecuaato na ca'ñee'. Quia na luaa' waa maxje' til'aaya na jndeina' na caljoo'ñe ts'a'. Ee Ty'ooots'om l'ue ts'oom na ticachooya tia' ñequio nn'a' w'aaya. ¹⁶ Ee ¿chiiu ntyji'yu' 'u tsa'scu na matseiyu' na jnda tma'co' na xocatsei'yu' sa' ñ'e' Ty'ooots'om cantyja 'na'? Ndo' mati 'u tsa's'a na matseiyu' na jnda tma'co', ¿chiiu ntyji'yu' na xocatseiyu' scu' cantyja 'na'?

Tilajndaaya na nlachuii'a na tyolaxmaa'ya

¹⁷ Ticwii cwiindyo' 'o, caljoya ts'om chiiu waa na jnda tquiaa Ty'ooots'om na matseixma' quia na t'maa' juu. Luaa' waa ñ'oom na mañequiaaya ndaa nn'a' cha'tso ntmaa' nn'a' na macwjee'e' cwentaa'a'. ¹⁸ Quia na t'maa' 'u, ¿aa jnda tuii 'naa' sei' cha'xje' cwil'a nn'a' judíos yonom ndana? Tintseichui' na luaa' waa. Ndo' xe' aa tyooluii 'naa' sei' quia na t'maa' 'u, taca'na' na caluii na ljo'. ¹⁹ Ee ticateijndeina' ts'a' xe' na tuii 'naa'ñee' tjaa'a' meii' xe' ticaluiina'. Ñ'oom na jndati na catseicanda' ts'a' ñ'oom na matsa'ntjom Ty'ooots'om.

²⁰ Jo' chii meiⁿquia cwii nnom na matseixmaⁿ ts'aⁿ quia na t'maⁿ Ty'o^ots'om jom, jo' jo' caljoya ts'oom. ²¹ ¿Aa cwiluiindy^u ts'aⁿ na mandi'ntjomtyeⁿ quia na t'maaⁿ 'u? Tinc'oom' ts'om' na ljo', saa xeⁿ nncju'naaⁿñena' na ndyaandy^u, cwa catsa' na ljo'. ²² Ee ts'aⁿ na m'aaⁿ na mandi'ntjomtyeⁿ quia na t'maⁿ Ty'o^ots'om jom na catseyoom'm ñ'eⁿ Ta Jesús, je' cwiluiñe ts'aⁿ na jnda seicandya^añê. Ndo' maljoyu cantyja 'naaⁿ ts'aⁿ na m'aaⁿ xjeⁿ 'naaⁿ quia na t'maⁿ Cristo jom, je' cwiluiñe ts'aⁿ na mandi'ntjomtyeⁿ nnoom. ²³ Juu ñequio na seijnda Ty'o^ots'om 'o, jeeⁿ ndya' jnda jo'. Jo' chii tiñequiandy^o na laxmaⁿ'yo' nn'aⁿ na cwindye'ntjomtyeⁿ ndaa nn'aⁿ. ²⁴ Quia jo' 'o nn'aⁿya, cwii cwiindy^o caljoya ts'om chiuu waa na tyotseixmaⁿ xjeⁿ na t'maⁿ Ty'o^ots'om juu.

Nn'aⁿ na tyoonc'unco ndo' yolcu na jnda ljondye

²⁵ Ñ'oom na cwita'x'ee'yo' no^o cantyja 'naaⁿ yolcu na tyoo'unco, tjaa'naⁿ ñ'oom na matsa'ntjom Ta Jesús ja cantyja 'naaⁿ ñ'oomwaa'. Saa nc'e na matseixmaⁿya ts'aⁿ na wi' ts'oom, ntyjii na ndaa nla'ñ'oom'ndyo' ñ'oom na matsjo^o cantyja 'naaⁿ ñ'oomwaa'. ²⁶ Cwe' nc'e jndye nnom quich'eena' tiempomeiiⁿ, jo' chii macwjii'a cwent^a na yaticheⁿ caljoo'ñe ts'aⁿ cha'xjeⁿ na jnda teijnoom'm. ²⁷ Xeⁿ m'aaⁿ scu', tintseytyuii' ljeii na tma'co' jom. Saa xeⁿ tjaa'naⁿ scu', tical'ue' ts'aⁿ na nluiñe scu'. ²⁸ Saa xeⁿ aa mma'co', tjaa'naⁿ jnaⁿ naljo'. Ndo' mati cwii yuscundyua, tjaa jnaaⁿ xeⁿ ncoco. Ee jndye nnom nawi' quich'eena' na nntjoom nn'aⁿ na nnc'unco ndo' ñe'cateijndeiya 'o na tincwinom'yo' joona'.

²⁹ 'O nn'aⁿya na cwila'yu'yo', luaa waa na ñe'catsjooya: Jnda teitsio^o xuee na nncwjee'nda' Cristo. Nc'e na ljo' joo nn'aⁿ na jnda t'unco, c'omna cha'cwijom tjaa'naⁿ lcuuna, tjaa'naⁿ s'aana. ³⁰ Joo nn'aⁿ na m'aⁿ na chjoo' n'om, c'omna cha'xjeⁿ quia waa xuee. Ndo' joo nn'aⁿ na m'aⁿ ncuee, c'omna cha'cwijom m'aⁿna na chjoo' n'omna. Ndo' nn'aⁿ na cwilajnda 'naⁿ c'omna cha'cwijom nchii 'naaⁿna jo'. ³¹ Ndo' joo nn'aⁿ na cwiwil'uee'ndye 'naⁿ na cwila'xmaⁿ cantyja 'naaⁿ tsjoomnancuewaañe, matsona' na c'omna cha'cwijom na ticajnda nquiuna ljo' la'xmaⁿna', ee juu na matseixmaⁿ tsjoomnancuewaañe mawjaantycwiina'.

³² Til'ue ts'o^o na jndye ñomtiu^u nc'om'yo', ee ts'aⁿ na tjaa'naⁿ scu^u, m'aaⁿ ts'oom chiuu nnc'oom jo nnom Ta Jesús, na nncjaawee' ts'oom ñ'eⁿñe, ³³ saa ts'aⁿ na m'aaⁿ scu^u, m'aaⁿ ts'oom cantyja 'naaⁿ 'naⁿ na macaⁿna' cha neiⁿ scoom'm ñ'eⁿñe. ³⁴ Ndo' na luaa' waa, tiñecwii m'aaⁿ ts'oom. Ñecwii xjeⁿ mat'uiina' cantyja 'naaⁿ yuscu na tjaa'naⁿ saa' ñequio yuscu ndyua na tyoococo. Joona m'aaⁿ n'omna cantyja 'naaⁿ ts'iaaⁿ 'naaⁿ Ta Jesús, na ñnequiandyeñ'eⁿna na la't'maaⁿndyena jom cantyja 'naaⁿ seiina ñequio espíritu 'naaⁿna. Saa yuscu na jnda mam'aaⁿ saa', m'aaⁿ ts'oom cantyja 'naaⁿ 'naⁿ na macaⁿna' ndo' ñequio chiuu na nnc'oom cha nncjaawee' ntyjii saaⁿaⁿ ñ'eⁿñe.

³⁵ Nchii matsjoo ñ'oommeiⁿ ndaa'yo' ee tical'ue ts'ooⁿ na nnc'unco'yo' saa cha na nnteijndeina' 'o ndo' cha na xcwee' n'om'yo' na ndye'ntjom'yo' nnom Ta Jesús.

³⁶ Ñ'oom na jndu'yo' na m'aaⁿ cwiindyoy' 'o na m'aaⁿ nomjnda na jnda jaawinom'na' na ndyuañe ndo' 'u na tsotyeeⁿ jnda mamatseituu' na ya xeⁿ nncocotoom, maxjeⁿ ya na nlui na ljo'. Ee nchii jnaⁿ na nntsa' na ljo'. ³⁷ Saa xeⁿ m'aaⁿ cwii ts'aⁿ na jnda seijndaa'ñe naquii' ts'om na xonquiaa na nncoco nomjnda, ee na manty'iaa' na tica'na', ya cats'aa na ljo'. ³⁸ Quia jo' ya mach'ee ts'aⁿ na maw'o ñomcaa' jnda, saa yati mach'ee juu ts'aⁿ na matseiljo nomjnda.

³⁹ Yuscu na m'aaⁿ saa', mat'uiityeⁿna' juu ñ'eⁿñê yochēⁿ na wando' tsaⁿñeeⁿ. Saa xeⁿ nncue' tsaⁿñeeⁿ, wanaaⁿ na ncoconnaaⁿaⁿ ñ'eⁿ meiⁿquia ts'aⁿ na l'ue ts'oom, macanda ñequii'cheⁿ ñ'eⁿ ts'aⁿ na matseyu'. ⁴⁰ Saa matseituu yati mach'eeⁿ xeⁿ na nljoo'ñê na ñenqueⁿ. Luaa' m'aaⁿ ts'ooⁿ cantyja 'naaⁿ ñ'oomwaa' ndo' mantyjii na matseixmaⁿya Espiritu na cwiluiñe Ty'oots'om.

Nantquie na cwila't'maaⁿndye nn'aⁿ 'naⁿ na cwe' nn'aⁿ nl'a

8 ¹ Je' nnc'oya ñ'oom na cwita'xe'yo' cantyja 'naaⁿ seii quioo' na cwila'cwjee nn'aⁿ na cwila't'maaⁿndyena 'naⁿ na cwe' nn'aⁿ l'a. Ñ'oom na mayuu' na cha'tsondyo cwiluiindyoy' nn'aⁿ na jndo' n'ooⁿya cantyja 'naaⁿ ñ'oomwaa', ndo' juu jo' wjan'oomna' jaa na c'ooⁿya na s'andyo, lcundyo. Saa juu na m'aaⁿya na jnda nquiuuya nn'aⁿ, mateijndeina' na tsaanajndaaya na cwila'yuu'a. ² Ts'aⁿ na matseituu na jndye waa na jndo' ts'om, tyootsei'noⁿ cha'xjeⁿ na maca'na' na caljeii. ³ Saa nquii ts'aⁿ na jnda ntyjii ñequio Ty'oots'om, mawajnaⁿaⁿ tsaⁿñeeⁿ.

⁴ Cantyja 'naaⁿ aa wanaaⁿ na nntquie'yo' seii quioo' na cwiwil'uee'ndye nn'aⁿ na cwila't'maaⁿndye 'naⁿ na cwe' nn'aⁿ l'a, cwila'nooⁿa na meiⁿcwii tjaa ljo' la'xmaⁿ joona' ee maxjeⁿ macanda nqueⁿ m'aaⁿ. ⁵ Ee cañoom'luee ñequio tsjoomnancue jndye nnom na maniom na cwila't'maaⁿndye nn'aⁿ na cwiluena na t'maⁿ ñ'oom la'xmaⁿ, saa joona' nchii nquii Ty'oots'om cwiluiindyena'. Ndo' na mayuu' na jndye 'naⁿ maniom na cwilue nn'aⁿ "Ta" ndaana', ndo' cwituee'ndyecjena cantyja 'naaⁿ joona'. ⁶ Saa cantyja 'naaⁿ jaa nmeiiⁿ ñecwii Ty'oots'om m'aaⁿ, ndo' jom cwiluiñê Tsotyaaya. Cantyja 'naaⁿ jom cha'tso na maniom, jom tqueeⁿ jo', ndo' nc'e jom, jo' na m'aaⁿya. Ndo' mati ñecwii m'aaⁿ na cwiluiñe na matsa'ntjom jaa, nquii Jesucristo. Cha'tsoti na maniom, cwim'aⁿna' nc'e nqueⁿ, mandii ñ'aaⁿ jaa.

⁷ Saa ticha'tsondye nn'aⁿ cwila'noⁿna na ljo' ee jnda ljeii'na' na cwila't'maaⁿndyena cwii na cwe' nn'aⁿ l'a, ndo' quia cwicwa'na nantquie'ñeeⁿ, cwitjeii'na cwentā na cwila't'maaⁿndyena juuna'. Ndo' nc'e na tyoowijndo' n'omna cantyja 'naaⁿ ñ'oommeiⁿ, jo' chii juu na

m'aaⁿ n'omna tseixmaⁿ na' cwii na jnda t'aa'na' na cwajndii. ⁸ Ee nchii cwe' aa macwa' ts'aⁿ nantquie'ñeeⁿ, oo, aa ticwaaⁿ aⁿ joona', jo' na macjaawee' ntyjii Ty'o^ots'om jom. Meiⁿ nchii na jeeⁿ ya nn'aⁿ ndyotyaaⁿ xeⁿ cwicwaa'a joona', oo nchii nn'aⁿ na tiann'aⁿ ndyotyaaⁿ xeⁿ ticwaa'a joona'. ⁹ Saa cal'andyo' cwenta na juu luaa' na wanaaⁿ na c'om'yo', titseixmaⁿ na' cwii na nnts'aana' na nntseitjooñe cwii nn'aⁿ yo' na cachjoo matseyu'. ¹⁰ Ee xeⁿ 'u na ntyji' chiuu wanaaⁿ na nntsa', mawacatyeeⁿ cwii joo yuu na cwila't'maaⁿ ndye nn'aⁿ cwii na cwe' nn'aⁿ l'a, ndo' cwii ts'aⁿ na tityeⁿ na matseyu' nty'iaaⁿ aⁿ 'u jo', nndaⁿ nnts'aana' na mache' na luaa', nnc'omt'maaⁿ ñe ts'oom na mati lcwaaⁿ aⁿ 'naⁿ na cwila't'maaⁿ ndye nn'aⁿ ty'o^oñeeⁿ. ¹¹ Ndo' na luaa', juu na matsei'noⁿ na wanaaⁿ na ljo' mache', nntsei'ndaa'na' juu nn'aⁿ na tityeⁿ matseyu', na mati tue' Cristo cwentaaⁿ aⁿ. ¹² Quia laa'ti' cwil'a'yo' ñequio joo nn'aⁿ yo' na tit'maⁿ cwilayu'ya n'om, cwila'tjoondyo' ndaana na cwila'ñeeⁿ ndyo' n'omna. Ndo' mati cwilaxmaⁿ yo' jnaⁿ jo nnom Cristo. ¹³ Jo' chii xeⁿ cantyja 'naaⁿ na macwa'a cwii nnom nantquie na cwiwil'ueeⁿ ndye nn'aⁿ na cwila't'maaⁿ ndye cwii na cwe' nn'aⁿ l'a, xeⁿ jnaaⁿ jo' matseitjooñe cwii nn'aⁿ ya na matseyu', quia jo' tajom cwinlcwaa'nda'a juuna' cha tintseilcwe'tya'na juu nn'aⁿ ya.

Ts'aⁿ na cwiluiñe apóstol, waa najndeii na matseixmaaⁿ

9 ¹ Joo na wanaaⁿ na l'a apóstoles, mati ja tseixmaⁿ jo' ndo' chiuu waa na laxmaⁿ na, mati jo' matseixmaⁿ ya. Jnda nty'ianooⁿ ya Jesús na cwiluiñe na matsa'ntjoom jaa, ndo' 'o cwiluiindy^o cwentaaⁿ aⁿ nc'e ts'iaaⁿ 'naaⁿ aⁿ na tyots'aaya quii'ntaaⁿ yo'. ² Nndaⁿ nnts'aana' na nt'omcheⁿ nn'aⁿ cwitjeii'na cwenta na ticaluiindy^o apóstol, saa jo ndaa 'o matsona' na cwiluiindy^o na ljo' ee juu na cwila'yu'yo' ma'moⁿ na' na ljo'.

³ Ndaa joo nn'aⁿ na cwilue na nchii cwiluiindy^o apóstol, luaa waa ñ'oom na matseilcwa'a ndaana. ⁴ Waa na matseixmaⁿ ya na wanaaⁿ na nnc'oñ^o na maca'na' na nlcwaa'a ndo' na nlcwaya, ⁵ ndo' mati wanaaⁿ na nncjaañ'eⁿ cwii yuscu na matseyu' quia jonquiaya ñ'oom naya cha'xeⁿ cwil'a nt'omcheⁿ apóstoles, ñequio ntyjee nquii Ta Jesús ndo' mati Pedro. ⁶ Ndo' ¿aa m'aaⁿ n'om'yo' na cwe' macanda nquii Bernabé ñ'eⁿ ndyo ja na ticatsona' na nnteixe'yo' jâ? ⁷ Ee ¿ñeeⁿ sondaro na cwe' nquii matseicatsuu 'naⁿ na maca'na' juu na macaa ndia'? Ndo' ¿ñeeⁿ ts'aⁿ na manom' cwii ntjom l'o^o uva na tiquii taa'na'? Ndo' ¿ñeeⁿ ts'aⁿ na mateix'e canmaⁿ na tic'uu ndaatsuuyo'? ⁸ Meiⁿ ticala'tiuu'yo' na cwe' tomti ñ'oom na m'aaⁿ n'om nn'aⁿ na macwjii'a. Ee ljeii na tqiaa Ty'o^ots'om nnom Moisés, majo'ti matsa'ntjomna'. ⁹ Ee naquii' libro'ñeeⁿ teiljeii: “Tintjaa'ndyo' bosa ndyuee quioo'ndyo yoché na cwil'a'yo' ts'iaaⁿ.” Saa meiiⁿ na ljo' teiljeii, nchii macanda ma'moⁿ na' na cwe'

cantyja 'naaⁿ quioo'ndyo ñjom ts'om Ty'o^ots'om. ¹⁰ Nc'e na m'aaⁿ ts'oom cantyja 'naaⁿya, jo' chii teiljeii ñ'oomwaa'. Naya 'naaⁿya na teiljeiina', ee juu ts'aⁿ na matseindyaa tyuaa ñequio juu ts'aⁿ na macwja' lqueeⁿ, cwil'ana ts'iaaⁿmeiⁿ na ntyjaa' n'omna na nleil'uee'ndyena na cwiwe'. ¹¹ Jo' chii nc'e na jnda jno^oâ tsjaaⁿ cantyja 'naaⁿ Espíritu naquii' ntaaⁿyo', ticwinom'na' na ñnequia'yo' na cwitaaⁿyâ ndaayo' chjoowi' 'naⁿyo' cha'cwijom cwii na jnda tue'. ¹² Nt'omcheⁿ nn'aⁿ na cwit'mooⁿ ndaa'yo' cwil'ana na cateijndei'yo' joona. Ndo' majndeiticheⁿ jâ wanaaⁿ na cateijndei'yo'.

Meiiⁿ na wanaaⁿ na ntaaⁿyâ na cal'a'yo' na ljo', saa meiⁿjom ndii' tyool'uuyâ. Ee cwila'quii n'o^oyâ naquii' na cwitjooⁿyâ cha ticatseitsaaⁿñena' na ya tsandye'yo' ñ'oom' Ty'o^ots'om. ¹³ 'O manquiu'yo' nquiee ntyee cwentaa nn'aⁿ judíos na cwindye'ntjom naquii' wats'om t'maⁿ cwitquiina sei quioo' na cwila'cwjeena na cwiñequia nn'aⁿ na cwila't'maaⁿndyena Ty'o^ots'om. Wanaaⁿ na cwitquiina sei'ñeeⁿ ee jo' jo' waa tio t'maⁿ yuu cwindye'ntjomna nnoom. ¹⁴ Ndo' cha'xjeⁿ cwicandaa naⁿñeeⁿ 'naⁿ na cwiwil'uee'ndyena, maluaa' saⁿntjom Ta Jesús na joo nn'aⁿ na cwiñe'quia ñ'oom naya 'naaⁿaⁿ nnto'ñoomna ljo' na macaⁿna' joona nc'e ñ'oom'm na cwiñe'quiana. ¹⁵ Saa meiⁿjom ndii' tyooaⁿa na ñnequia'yo' ljo' na macaⁿna' ja, meiⁿ nchii matseiljeiya ñ'oomwaañe cha nnteijndei'yo' ja. Ee yati ntyjii meiⁿ na aa nc'io na tintsuu nayawaañe na cantyja 'naaⁿ jo' matseis'andyo.

¹⁶ Saa tyoocwji's'andyo na mañequiaya ñ'oom naya 'naaⁿ Ty'o^ots'om ndaa'yo' ee ts'iaaⁿñeeⁿ matseixmaⁿya. Ndo' jeeⁿ nty'iaa'ndyo xeeⁿ ticatseicandaya juuna'. ¹⁷ Jo' chii xeⁿ mañequiaya ñ'oom nc'e na l'ue ts'o^on nnc^o, matsona' na nncwantjoⁿ, saa xeⁿ mats'aa na ljo' nc'e na maty'ioom ts'iaaⁿñeeⁿ ja, quia jo' cwe' matseicandaa'ndyo ts'iaaⁿ na ty'ioom ja. ¹⁸ Quia jo' juu na mawantyjoⁿ, na m'aaⁿya na neiⁿya na mañequia ñ'oom na macwji'n'maaⁿñe Ty'o^ots'om nn'aⁿ na meiⁿcwii na chojnaⁿyo' no^on, na nchii nncwantjoⁿya 'naⁿ na macaⁿna' ja na mañequiaya ñ'oom naya 'naaⁿ Ty'o^ots'om.

¹⁹ Ja meiⁿ nchii cwiluiindy^o moso na mandi'ntjomtyeⁿ nnom patrom 'naaⁿ, saa jnda tqueⁿndyo cheⁿnnc^o na matseixmaⁿya na ljo' ndaa cha'tso nn'aⁿ. Mats'aa na ljo' cha majndyeti nn'aⁿ nncwantjoⁿ cwentaa' Cristo. ²⁰ Quia na m'aaⁿya quii'ntaaⁿ nn'aⁿ judíos, mats'aa cha'na cwii joona na m'aⁿna nacje 'naaⁿ ljeii na tquiaa Moisés cha nncwantjoⁿya joona cwentaa' Cristo, meiⁿ tic'o^oya nacje 'naaⁿna'. ²¹ Ndo' jo ndaa nn'aⁿ na tic'omna nacje 'naaⁿ ljeii na tqueⁿ Moisés, mats'aa cha'na cwii nquieena cha nncwantjoⁿya joona, meiⁿ na mayuu' m'aaⁿya nacje 'naaⁿ ljeii 'naaⁿ nquii Ty'o^ots'om nc'e na m'aaⁿya nacje 'naaⁿ Cristo. ²² Quia na m'aaⁿya ñ'eⁿ nn'aⁿ na cachjoo na cwila'yu'ya n'om, mati mats'aa na cachjoo matseiyu'ya ts'o^on cha mati nncwantjoⁿya joona. Ndaa cha'tso nn'aⁿ mats'aa na matseixmaⁿya cha'xjeⁿ joona cha nt'omndye joona

nlui'n'maa'ndyena. ²³ Mats'aa cha'tso nmei' nc'e ñ'oom naya na cantyja 'naa' jo' cwilui'n'maa'ndye nn'a' cha mati nntseijomndyo ñequio naya na cwito'ñoom nn'a' cantyja 'naa'na'.

²⁴ 'O manquiu'jndaa'ndyo' quia cwitjomndye nn'a' na nleinom, cha'tsondyena cwileinomna, saa macanda juu ts'a' na nncuee'jndyee nla't'maa'ndye nn'a' juu. Quia jo' cala'jnda'yo' cha'xje' matseijndei tsa'ñee'. Cjoo'yaya n'om'yo' na cwindye'ntjom'yo' nnom Ty'ooots'om cha mati nntseit'maa'ñê 'o. ²⁵ Saa cjaañjoom' n'om'yo' cantyja 'naa' joo nn'a' na cwileinom, jndye nnom na cwila'ljondyena, ee cwicantyyaa' n'omna na nnta'ntjomna, meii' juu 'na' na cwita'ntjomna tyuaa' cwiwi'ndaa'na'. Jo' chii mati jaa cjoo'yaya n'oo'ya na cwindya'ntjoo'tyaa'ya nnom Ty'ooots'om nc'e juu na nnto'ñoo'ya na ñnequiaa' ndaaya tijoom cwi'ndaa'na'. ²⁶ Cantyja 'na' ja luaa tyoots'aa cha'na mach'ee ts'a' na cwe' maleinomto na tijndaa' yuu wjaayuu. Cantyja na mandi'ntjo'ya nnoom, mei' tyoots'aa cha' cwil'a nn'a' na cwe' cwituee'to nnda' naquii' jndye. ²⁷ Nchii nmei' mats'aa. Ja ñequio na jndei'na' maju'cja seii'a na catseicandana' na matsa'ntjo'ya juuna', cha cwii na jnda' t'moo'ya ndaa nt'omche' ticwji'ndyona' ja na ticwil'uendyo naquii' ts'iaa' 'naa' Cristo.

Ticala't'maa'ndyo mei'quia na cwe' nn'a' l'a

10 ¹ 'O nn'a'ya na cwila'yu'yo', l'ue ts'oo' na cala'no'yo' quia jlui' welooya nn'a' judíos Egipto, cha'tsondyena tyotseintyjo Ty'ooots'om ncwaa' nchquiu nacjoona ndo' cha'tsondyena teinomna Ndaaluee Wee. ² Ndo' na luaa', cha'tsondyena teits'oomndyena na seitjoom'na' joona ñ'e' Moisés quia na tyotseintyjona' nchquiu'ñee' cjoona ndo' na teinomna ndaaluee'ñee'. ³ Ndo' mati cha'tsondyena tyocwa'na maná na tqiaa Ty'ooots'om na jna'na' cañoom'luee, ⁴ ndo' cha'tsondyena tyowena ndaatoo na tyocalui'na' quii' tsjo' na ñ'e' ñ'e'na' ñ'e'ndyena. Nquii Cristo cwiluiñe tsjo'ñee'. ⁵ Saa meii' na luaa' tyom'a'na, maxje' majndyendyetina ticjaawee' ntyjii Ty'ooots'om ñ'e'ndyena ee tical'ana yuu na l'ue ts'oom. Macwe' jo' jndyendyena tjana ndyuaa yuu tja nn'a' c'oom.

⁶ Cha'tso nmei' na tyotjoomna laxma'na' cwii na ma'mo'na' ndaaya na tila'quee' n'oo'ya cwii cwii nnom natia cha'xje' tyola'quee' n'omna. ⁷ Jo' chii tila't'maa'ndyo' cwii na cwe' nn'a' l'a cha'xje' ñel'a nt'omndye joona ee tso ñ'oom na teiljei: "Ty'ewindyuaandye nn'a' na nlcwa' ndo' na nncwe, jnda' jo' teicantyyana na l'ana cha'xje' nn'a' na tic'om nacje 'naa' Ty'ooots'om." ⁸ Mei' tanc'oo'ya na cwe' luaa'ndyo ñ'e' nt'omche' nn'a' cha'xje' na tyol'a joona ee jnaa' jo' na s'aa Ty'ooots'om na ñecwii xuee tja ntquiuu nchoo' ndyee mei'ndyena. ⁹ Mei' tacal'aaya xje' Cristo cha'xje' ñel'a nt'omndye joona, ee jo' na tquii canduu joona ndo' tjana. ¹⁰ Mei' tilancjoo'ndyo' nnom Ty'ooots'om cha'xje' ñel'a

nt'omndye joona, ndo' jnaaⁿ jo' na jñoom ángel na jndyotseicwjee joona.

¹¹ Cha'tso nmeiⁿ na tyotjoom weloo welooya, laxmaⁿna' cwii na ma'moⁿndyeyuna' ndaaya, ndo' teiljeii joona' quii' ñ'oom' Ty'o^ots'om cwii na matseijndo'na' n'o^oya chiuu macaⁿna' na c'o^oya ncueemeiiⁿ na macanda. ¹² Jo' chii ts'aⁿ na matseitiuu na meintyjee'tyeⁿ cantyja 'naaⁿ Ty'o^ots'om, cats'aañe cwenta na ticju'cjena' juu. ¹³ Ee joo na cwiwinom'yo' na maqueⁿna' xjeⁿ 'o cha cala'tjoondyo' nnom Ty'o^ots'om, ticachuii'na' ñequio na cwitjoom nt'omcheⁿ nn'aⁿ. Saa jom cwiluiiñe na mayoom'm, meiⁿ tijoom quiaaⁿ na juu na maqueⁿna' xjeⁿ 'o nncwinom'na' juuna' na xocanda nnaⁿndyo' ndo' mati ñequiaaⁿ na ya nluii'ndyo' naquii' juuna'. ¹⁴ Jo' chii 'o nn'aⁿya na jeeⁿ wi' ts'o^oya, cantyja 'naaⁿ na nla't'maaⁿndyo' 'naⁿ na cwe' nn'aⁿ cwil'a, c'om'yo' cha'na ts'aⁿ na jndeii maleinom na nquiaⁿaⁿ na nnt'uii nawi' jom. ¹⁵ Matsjoo na ljo' ndaa'yo' ee ntyjiiya na 'o cwila'noⁿ'yo'. Jo' chii queⁿya'yo' cwenta ñ'oom na matsjoo. ¹⁶ Ee cwiñequiaaya na quianl'uaa' Ty'o^ots'om xjeⁿ na cwito'ñooⁿya waso, juu jo' ma'moⁿna' na cwilajomndyo cantyja 'naaⁿ nioom' Cristo. Ndo' quia cwityjaaya tyoo' ma'moⁿna' na cwilajomndyo cantyja 'naaⁿ seiⁿeⁿ. ¹⁷ Ee meiⁿ na jndyendyo saa ñe'cwii tyoo' cwicwaa'a ndo' nc'e na ljo' ñe'cwii sei' cwiluiindy.

¹⁸ Calanoⁿ'yo' cantyja 'naaⁿ tmaaⁿ nn'aⁿ Israel. Nn'aⁿ na cwitquiina sei quioo' na cwitioona nacjoo' tio wats'om t'maⁿ, xjeⁿñeeⁿ cwilajomndyena cantyja 'naaⁿ quioo' na cwila'cwjeena. ¹⁹ Ndo' na matsjoo na luaa', tila'tiuu'yo' na ñe'catsjoo na juu 'naⁿñeeⁿ na cwila't'maaⁿndye nn'aⁿ waa najndeii na matseixmaⁿna' meiⁿ nchii na ñe'catsjoo na juu sei' na cwiñequia naⁿñeeⁿ nnom juuna' jndati matseixmaⁿna' ñequio meiⁿquia sei'. ²⁰ Ñ'oom na matsjoo cantyja 'naaⁿ ñ'oomwaa', joo nn'aⁿ na tic'omna cantyja 'naaⁿ Ty'o^ots'om, quia cwila'cjweena quioo', nchii nnom jom cwiñequiana sei'ñeeⁿ, ndaa naⁿjndii cwiñequiana joona'. ²¹ Ee ticatsona' na nncwe'yo' na njom waso na cwiwe nn'aⁿ na cwila'jomndye ñequio Cristo, ndo' mati nncwe'yo' cwii na matseixmaⁿna' cantyja 'naaⁿ naⁿjndii. Meiⁿ ticatsona' na nlcwa'yo' na cwila'jomndyo ñequio Cristo, ndo' mati nlcwa'yo' cwii na matseixmaⁿna' cantyja 'naaⁿ naⁿjndii.

²² ¿Aa ñe'cal'aaya na jaa jndaatyaaya nchiiti jom ndo' jom jeeⁿ xueeⁿ jaa?

Ts'aⁿ na matseyu' cats'aaⁿ cha'tso ñequio na wi' ts'oom tyjenn'aⁿñe

²³ Waa ñ'oom na cwilue nn'aⁿ: “Wanaaⁿ na nnts'aa ts'aⁿ meiⁿquia na ñe'cats'aa.” Ñ'oom na mayuu' jo', saa ticha'tso mateijndeiiina' jom. Mayuu' wanaaⁿ na nnts'aa ts'aⁿ ljo' na l'ue ts'oom, saa ticha'tso mateijndeiiina' na nncjaanajneiⁿ jo nnom Ty'o^ots'om. ²⁴ Ee nchii

ñequii'cheⁿ nc'oom' ts'om ts'aⁿ cantyja 'naaⁿ nqueⁿ. C'oom' ts'oom cantyja 'naaⁿ nt'omcheⁿ nc'iaaⁿ'aⁿ na cwila'yu', cwaaⁿ cwii na nnts'aaⁿ na nnteijndeina' joona na nnc'oonajndana cantyja na cwila'yu'na.

²⁵ Wanaaⁿ na nntquie'yo' cha'tso nnom sei' na cwileil'ua. Meiⁿ tinta'xe'yo' áaa cwiwil'uee'ndye nn'aⁿ sei'ñeeⁿ xjeⁿ na cwila't'maaⁿ'ndyena cwii na cwe' nn'aⁿ cwil'a? Ee na nliu'yo' na ljo' nndaā nnts'aana' na nntsei'ndaa'na' nqui'yo'. ²⁶ Ee naquii' Salmos matsona': "Tsjoomnancue ñequio 'naⁿ na matseixma'na', cha'tso jo' 'naaⁿ nquii Ta Ty'oōts'om."

²⁷ Cwii ts'aⁿ na nchii ts'aⁿ na matseyu', xeⁿ maqueeⁿ'ñê cwii 'o waⁿ'aⁿ na nlcwa' ñ'eⁿ'ñê, wanaaⁿ na nncja' xeⁿ aa l'ue ts'om'. Cwa' meiⁿquia na mañequiaa tsaⁿ'ñeeⁿ. Saa cha tintsei'ndaa'na' ntyji' tincwaxe' aa ts'iaaⁿ sei'ñeeⁿ na cwila't'maaⁿ'ndye nn'aⁿ cwii na cwe' nn'aⁿ l'a. ²⁸ Saa xeⁿ nntso cwii ts'aⁿ njom': "Sei'waañe jnda tacatyee'na' cwentaa' cwii na cwe' nn'aⁿ l'a", jo' chii 'u je' tinlqui' juuna'. Ee meiⁿ na xocatsei'ndaa'na' 'u xeⁿ na nlqui' juuna' saa nntsei'ndaa'na' ts'om ts'aⁿ na t'moⁿ njom' ee m'aaⁿ ts'oom na ticatsona' na nlqui' juuna'.

²⁹ Matseinaⁿ cantyja 'naaⁿ juu na m'aaⁿ ts'om tsaⁿ'ñeeⁿ na seicandii 'u, nchii cantyja 'naaⁿ na m'aaⁿ ts'om' nncu'.

Saa nndaā nnts'aana' na nncwax'ee cwiindyoyo' 'o: "¿Chiuu na matsona' na ja catseiljondyoyo cwe' chiuu na m'aaⁿ ts'om cwiicheⁿ? ³⁰ Ee xeⁿ mañequiaa na quianl'uaa' Ty'oōts'om cantyja 'naaⁿ juu na macwa'a, quia jo' áyuu waa na nncju'naa'ñena' na nntso ts'aⁿ na tixcwe mats'aa?"

³¹ Quia jo' na cwicwa'yo' ñequio na cwiwe'yo', ñequio meiⁿquia na cwil'a'yo', na cha'tso na cha'tso ñequii'cheⁿ cats'aana' na caluiit'maⁿ'ñeti Ty'oōts'om cantyja 'naaⁿ jo'. ³² Til'a'yo' cwii nnom na cantyja 'naaⁿ jo' nntseilcwe'na' ts'aⁿ cantyja 'naaⁿ Ta Jesús, meiⁿ na ts'aⁿ judío, meiⁿ nn'aⁿ na nchii judíos, ndo' meiⁿ joo nn'aⁿ na laxmaⁿ tmaaⁿ cwentaa' Ty'oōts'om. ³³ Malaa'ti' waa na quits'aaya, ee matseijndo na cha'tso cantyja 'naⁿya nncjaawee' n'om nn'aⁿ. Nchii mal'ueendyo na joo na mats'aa na cwe' ja cateijndeina', saa cateijndeina' na majndyeti nn'aⁿ nlui'n'maaⁿ'ndyena.

11 ¹ Jo' chii cw'aa'ndyo' ja cantyja na mats'aaya ee ja jom'aaⁿya cha'xjeⁿ na tyoch'ee Cristo.

Luaa c'om yolcu quia cwiitjomndye nn'aⁿ

² Matseit'maaⁿ'ndyo 'o na ñequii'cheⁿ cwijaañjoom' n'om'yo' ja ndo' cwilawe'yo' ñ'oom na jnda tquaaⁿya ndaa'yo' ³ Saa l'ue ts'ooⁿ na nla'noⁿ'yo' na tseixmaⁿ Cristo xqueⁿ cwii cwii tsaⁿ's'a ndo' juu tsaⁿ's'a tseixmaaⁿ xqueⁿ scoom'm cha'xjeⁿ nquii Ty'oōts'om tseixmaaⁿ xqueⁿ Cristo. ⁴ Jo' chii xeⁿ matiom tsaⁿ's'a 'naⁿ xqueⁿ quia matseineiⁿ nnoom oo quia mañequiaa ñ'oom'm, matseijnaaⁿ tsaⁿ'ñeeⁿ Cristo na cwiluiiñe xqueeⁿ. ⁵ Saa xuii' cantyja 'naaⁿ cwii yuscu, xeⁿ ticataⁿ xqueⁿ quia na

matseineiⁿ nnom Ty'ooots'om oo quia na mañequiaa ñ'oom'm matseijnⁿaa'aⁿ saa'aⁿ. Xeⁿ na ljo' mach'eeⁿ matseijomna' cantyja 'naa'aⁿ cha'cwijom na jnda teinqui' casei xqueeⁿ. ⁶ Ndo' xeⁿ tical'ue ts'om yuscu na ñjom 'naⁿ xqueeⁿ, quia jo' cateinqui' xqueeⁿ. Saa nc'e na jeeⁿ t'maⁿ matseijnⁿaa'na' jom na nnoⁿ soxqueeⁿ oo na nnteinqui' casei, quia jo' cañjom 'naⁿ xqueeⁿ. ⁷ Saa tsaⁿs'a je', ticaty'iomna' na ñjom 'naⁿ xqueeⁿ ee jluii'ñe Ty'ooots'om ndo' tqueeⁿ na cantyja 'naa' juu na caluiit'maaⁿñê saa wandyo^o cantyja 'naa' tsaⁿscu ee tsaⁿs'a matseit'maaⁿñena' cantyja 'naa'aⁿ. ⁸ Ee quia na s'aa Ty'ooots'om tsaⁿs'a, nchii teil'uee'ñê tsaⁿscu na tuui na ljo', teil'uee'ñê tsaⁿs'a na s'aaⁿ tsaⁿscu. ⁹ Meiⁿ nchii na s'aaⁿ tsaⁿs'a cha cateijndeina' tsaⁿscu, s'aaⁿ tsaⁿscu cha cateijndeina' tsaⁿs'a. ¹⁰ Manc'e na luaa' waa ndo' nc'e na cwiqueⁿ ángeles cwenta, jo' chii matsona' na cañjom 'naⁿ xqueⁿ yuscu cha m'moⁿna' na maju'ñecjeeⁿ nnom saa'aⁿ. ¹¹ Saa cantyja 'naa' jaa nn'aⁿ na cwila'yu', waa naya 'naa' tsaⁿs'a nc'e tsaⁿscu, ndo' mati waa naya 'naa' tsaⁿscu nc'e tsaⁿs'a. ¹² Ee meiiⁿ na mayuu' najndyee s'aa Ty'ooots'om tsaⁿscu ee tsaⁿs'a, saa mati na mayuu' na m'aaⁿ tsaⁿs'a ee tsaⁿscu, ndo' cha'tsoñ'eⁿ cwinaⁿ na m'aaⁿ Ty'ooots'om.

¹³ C'oom'ya n'om'yo', ¿aa ndya' maty'iomyana' na ticañjom 'naⁿ xqueⁿ yuscu na nntseineiⁿ nnom Ty'ooots'om? ¹⁴ Mati ma'moⁿyana' ndaaya na matseijnⁿaa'na' tsaⁿs'a quia na teincoo sooxqueeⁿ, ¹⁵ saa matseit'maaⁿñena' yuscu quia na cwiwiteincoo soxqueeⁿ, ee joona' tseixmaⁿna' cwii na matseicu'na' xqueeⁿ. ¹⁶ Saa xeⁿ m'aaⁿ ts'aⁿ na ticjaawee' ts'om ñ'oomwaa', macaⁿna' na catsei'nooⁿoⁿ na meiⁿ já meiⁿ nn'aⁿ cwii cwii tmaaⁿ na macwji' Ty'ooots'om cwentaa'aⁿ, tjaa'naⁿ cwicheⁿ nnom na cwil'aaya.

Tixcwe cwil'ana quia cwicwa'na Cena na tqueⁿ Jesucristo

¹⁷ Ñ'oom na matseiljeitya ndaa'yo' leicandaa nntsjo^o na ya cwil'a'yo' ee mach'eena' quia cwtjomndyo' juu na cwil'a'yo' matseilcwe'na' 'o nchii na mateijndeina' 'o. ¹⁸ Ee najndyee jnda mandiiya quia cwtjomndyo' na nla't'maaⁿndyo' Ty'ooots'om, titjoom' m'aⁿyo', ndo' m'aaⁿ ts'o^o na ljo'. ¹⁹ Ee maxjeⁿ nleitquioo'yu^u na titjoom' m'aⁿyo' cha m'moⁿna' 'ñeeⁿ joo quii'ntaaⁿyo' m'aⁿna na xcwee' n'omna jo nnom Ty'ooots'om. ²⁰ Ndo' nc'e na titjoom' m'aⁿyo', jo' chii juu na cwicwa'yo', tiyuu' na tseixmaⁿna' nquii Cena na seijndaa'ñe Ta Jesús. ²¹ Ee quia cwicwa'yo' cwii cwiindy^o matseityuaa'ti na nlcwa' na jndyoñ'oom, meiⁿ tiquiaaⁿ na nntseijomñe cwiicheⁿ x'iaa'aⁿ na matseyu', ndo' na ljo' nt'om joona ma'ndiina' na ñe'jndo' ndo' nt'om jnda jndyee. ²² ¿Chiuu 'o? ¿Aa maxjeⁿ tjaa'na' l'a'yo' yuu na nleiñ'oom' na nlcwa'yo' ndo' na nncwe'yo'? ¿Aa maxjeⁿ ticuee' n'om'yo' nc'iaa'yo' na mati cwiluiindy^e tmaaⁿ cwentaa' Ty'ooots'om? Ee na laa'ti' na cwil'a'yo'

cwila'jnaⁿyo' joo nc'iaa'yo' na wanty'iaa m'aⁿ. ¿Aa cwila'tiuu'yo' na jeeⁿ xcwe na cwil'a'yo'? Leicandaa nntsjoo na ljo'.

Cantyja na seiwndaa'ñe Jesucristo na cuua Cena

(Mt. 26.26-29; Mr. 14.22-25; Lc. 22.14-20)

²³ Ee nnom Ta Jesús to'ñoⁿya ñ'oom na t'mooⁿya ndaa'yo', na mañejuu teijaaⁿ na seiquiao Judas jom luee nn'aⁿ, to'ñoom tyoo' ²⁴ ndo' jnda na tqiaaⁿ na quianl'uaa' Ty'ooots'om cantyja 'naaⁿna', tyjeeⁿ juuna'. Tsoom: “Cato'ñoom'yo' tyoo'waa, cwa'yo' juuna'. Seii'a cwiluiñena'. Mañequiaandyo na nnc'io cha nncwañoom'na' 'o. Ñequii'cheⁿ na luaa' nntsal'a'yo' cha cat'moⁿyo' na cwicañjom n'om'yo' ja.” ²⁵ Ndo' mati jnda na tcwa'na, to'ñoom waso, tsoom: “Juu wasowaañe tseixmaⁿna' ñ'oomxco na maquaⁿya ñequio nioom'a. Cwii cwii ndii' na cwiwe'yo' juuna', cjaañjoom'tyeⁿ n'om'yo' ja.” ²⁶ Jo' chii ticwii cwii ndii' na cwicwa'yo' tyoo'waa ndo' na cwiwe'yo' na ñjom wasowaa, cwitsatjei'yuu'ndyo' ndaa nn'aⁿ cantyja na tue' Ta Jesús, hasta quia na nndyonnaaⁿaⁿ.

Nchii cwe' nntseijomñeto ts'aⁿ quia cwicwa' nn'aⁿ Cena

²⁷ Jo' chii meiⁿquia ts'aⁿ na macwaaⁿaⁿ tyoo'waa oo ma'om na ñjom wasowaa na tic'oom'ya ts'oom na jnda tseixmaⁿna', waa jnaaⁿaⁿ nacjoo' seii' ndo' nioom' Ta Jesús. ²⁸ Nc'e na ljo', matsona' na cwii cwii ts'aⁿ cwtijoocheⁿ na nlcwaaⁿaⁿ tyoo'ñeeⁿ ndo' na nnc'om na ñjom waso'ñeeⁿ, c'oom'ya ts'oom na aa tjaa'naⁿ cwii nnom cantyja 'naaⁿaⁿ na matseicu'na' na nntseijomñe juu jo'. ²⁹ Ee ts'aⁿ na cwe' macwa'to ndo' cwe' ma'uuto meiⁿ ticwjaa'ñe cwent na la'xmaⁿna' seii' Ta Jesús, juu na macwaaⁿaⁿ ndo' ma'om, matseijndaa'ñena' na waa jnaaⁿaⁿ cantyja 'naaⁿna'. ³⁰ Macwe' jnaaⁿ na nmeiiⁿ cwil'a'yo', jo' chii majndyendyo' 'o wii'yo' ndo' tijnda'yo', hasta nt'om nc'iaa'yo' jnda tja. ³¹ Saa xeⁿ ñequii'cheⁿ na cwiquaaⁿyaaya cwent aa cwil'aaya yuu na maty'iomyana', quia jo' tixocaⁿna' na nnts'aa Ta Jesús xjeⁿ jaa, ³² ee quia mañequiaa Ta Jesús jaa, luaa' mach'eeⁿ cha ntsaala'nooⁿa ndo' cha ticaⁿna' na nnt'ueeⁿ jaa cha'xjeⁿ nnt'ueeⁿ nn'aⁿ na la'xmaⁿ cantyja 'naaⁿ tsjoomnancue.

³³ Jo' chii 'o nn'aⁿya na cwila'yu'yo', quia cwtijomndyo' na nlajomndyo' na nlcwa'yo' ndo' nncwe'yo' na cwicañjom n'om'yo' na tue' Ta Jesús, cwindo'yo' cwii ndo' cwii x'iaa'yo'. ³⁴ Ndo' xeⁿ m'aaⁿ cwiindyo' 'o na ñe'jndo' cwa'jñeeⁿ na waa waⁿaⁿ cha' ticaⁿna' na nnt'uii Ty'ooots'om jom na matseijomñe quia cwilajomndyo' Cena. Nt'omcheⁿ ñ'oom na cwita'x'ee'yo' nooⁿ, cuajndyaa na m'aⁿyo' quia jo' nntseijndaa'ndyo joona'.

Jndye nnom ts'iaaⁿ mañequiaa Espíritu Santo

12 ¹ 'O nn'aⁿya na cwila'yu'yo', l'ue ts'ooⁿ na caliu'yo' chiuu mach'ee Espíritu Santo na cwicandaaya cwii cwii nnom na l'ue ts'oom cha ndaaⁿ ndya'ntjooⁿya nnom Ty'oots'om.

² 'O manquiu'jndaa'ndyo' cwiitjoocheⁿ na cwila'yu'yo', tyojaachuuna' 'o cha'cwijom na nchjaaⁿyo' na cwe' tyola't'maaⁿndyo'to'yo' joo na cwe' nn'aⁿ ñel'a na xondaaⁿ nla'nei'na'. ³ Jo' chii matsjooⁿ ndaa'yo', ts'aⁿ na matseixmaⁿ Espíritu Santo, xocatso na cju'wi'na' Jesús. Ndo' mati xocatso ts'aⁿ na cwiluiiñe Jesús na matsa'ntjoom juu xeⁿ nchii m'aaⁿ tsaⁿñeeⁿ nacje 'naaⁿ Espíritu Santo.

⁴ Nquii Espíritu Santo jndye nnom mañequiaaⁿ na cwicandaaya cha cwicandaaⁿ cwil'aaya ts'iaaⁿ 'naaⁿ Ty'oots'om. Saaⁿ manquiiyeeⁿ mañequiaaⁿ na cwilaxmaaⁿya joo jo'. ⁵ Jndye nnom niom na cwindya'ntjooⁿya nnom Ta Jesús, saaⁿ manquiiiti Espíritu matseijndaa'ñê cha'tso joona'. ⁶ Jndye nnom maniom na tjachuii' na cwiwil'ue cha cwicandaaⁿ cwil'aaya ts'iaaⁿ 'naaⁿ Ty'oots'om. Saaⁿ nqueⁿ ñe'cwii cwiluiiñê na mateijneiⁿ cwii cwiindyō na cwil'aaya joona'. ⁷ Nnom cwii cwiindyō mañequiaa Ty'oots'om cwii nnom na ma'moⁿna' na laxmaaⁿya Espíritu cha nntei'jndeina' nnc'iaaya na cwila'yu'. ⁸ Ñ'eeⁿ nn'aⁿ na mañequiaaⁿ na cwiñe'quia ñ'oom' Ty'oots'om ñequio na jndo'ya n'om. Ndo' ñ'eeⁿ nt'omndye joona manquiiiti Espíritu mañequiaaⁿ na ndaaⁿ nla'nei'na ñ'oom cha nla'noⁿ nn'aⁿ chiuu l'ue ts'om Ty'oots'om na nnc'omna. ⁹ Ñ'eeⁿndye joona na cantyja 'naaⁿ Espíritu Santo la'xmaⁿna na cwila'yu'ya n'omna, ndo' nt'omndye joona cwicandaana na nla'n'maⁿna nn'aⁿwii. ¹⁰ Nt'omndye joona cwicandaana na ndaaⁿ nl'ana ts'iaaⁿ t'maⁿ na ticaluiina' cantyja 'naaⁿ najndeii nquii ts'aⁿ. Ndo' nt'om joona cwicandaana na jeeⁿ ya cwiñequiana ñ'oom na ma'moⁿ Ty'oots'om ndaana. Nt'om joona cantyja 'naaⁿ Espíritu mañequiaa Ty'oots'om na ndaaⁿ ntjeii'na cwentia quia tiyuu' cwii ñ'oom na cwiñequia nn'aⁿ ndo' quia na mayuu' juuna'. Nt'om cwicandaaⁿ cwila'neiⁿ nt'omcheⁿ nnom ñ'oom ndo' wandyoōⁿ nn'aⁿ na mañequiaaⁿ na cwicandaaⁿ cwila'teincōo'na chiuu ma'moⁿ ñ'oom'ñeeⁿ. ¹¹ Espíritu Santo ñecwii cwiluiiñê. Manquiiyeeⁿ mañequiaaⁿ cwii cwii nnom ts'iaaⁿmeiⁿ ndaaⁿ nn'aⁿ cantyjati na l'ue ts'oom.

Luaa matseijomna' na tjat'uii'ndyo ñ'eⁿ Cristo

¹² Matseijomna' cantyja 'naaⁿ Cristo cha'cwijom ts'aⁿ na majndye tjat'uii' ndo' meiiⁿ jndyena' saaⁿ ñecwii ts'aⁿ tseixmaⁿ. ¹³ Ee cha'tsondyō meiiⁿ nn'aⁿ judíos jaa, meiiⁿ cwiluiindyō nn'aⁿ na cwila'neiⁿ ñ'oom griego, oo meiiⁿ nn'aⁿ na cwindya'ntjooⁿtyaaⁿya ndaaⁿ patrom 'naaⁿya, oo meiiⁿ nn'aⁿ na m'aaⁿya xjeⁿ 'naaⁿ ncjooⁿ, cwii na jndaⁿ teits'oomndyo

cwiluiindyō ñecwii seii' Cristo nc'e ñecwii cwiluiñe Espíritu, ndo' cha'tsondyō jnda to'ñōōⁿya jom.

¹⁴ Ee seii' ts'aⁿ nchii ñe'cwii nnom tseixmaⁿ, jndye nnom tjacañjoom'ñê. ¹⁵ Xeⁿ cwe' nntso x'ee ts'aⁿ: “Nc'e na titseixmaⁿya ts'ō ts'aⁿ jo' chii ticatseixmaⁿya cantyja 'naaⁿ seii' ts'aⁿ.” ¹⁶ Ndo' mati xeⁿ nntso tsua'qui ts'aⁿ: “Nc'e na nchii cwiluiindyō ts'omnnom ts'aⁿ, jo' chii ticat'uiindyō cantyja 'naaⁿ seii' ts'aⁿ.” Meiiⁿ na luaa' nntso tsua'qui ts'aⁿ, saa tiyuu' na ljo'. Maxjeⁿ t'uui'na' ts'aⁿ. ¹⁷ Ee xeⁿ cha'waañe ts'aⁿ ñequii'cheⁿ n'omnnom cwiluiñê, ¿chiiu nnts'aayom na nñeeⁿ? Ndo' mati xeⁿ cha'waañe ts'aⁿ ñequii'cheⁿ lua'queeⁿ, ¿chiiu nnts'aayom na nncwjaaⁿ jndye? ¹⁸ Saa Ty'ōots'om jnda seinchoom'm ticwii cwii nnom nmeiⁿ naquii' seii' ts'aⁿ cha'xjeⁿ na l'ue ts'oom. ¹⁹ Xeⁿ cha'waañe ts'aⁿ ñe'cwii nnom cwiluiñê, meiⁿchjoo ticandaa'ñe seii' ts'aⁿ. ²⁰ Saa meiiⁿ na jndye nnom na tqueⁿ Ty'ōots'om na tjacat'uiiñe ts'aⁿ, maxjeⁿ ñ'eⁿ joo jo' candaa' cwiluiñe seii' ts'aⁿ.

²¹ Ts'omnnom ts'aⁿ tijoom ndaaⁿ nntsona' nnom ts'ō ts'aⁿ: “Ja tjaa yuu l'uee'ndyō 'u.” Meiⁿ xqueⁿ ts'aⁿ tijoom ndaaⁿ nntsona' ndaaⁿ nc'ee ts'aⁿ: “Ja tjaa yuu l'uee'ndyō 'o.” ²² Saa jeeⁿ wandyō' waa cantyja 'naaⁿ ñ'oomwaa'. Ee mañ'eeⁿ yuu na ñjoom'ñe ts'aⁿ na cwi'tjeii'a cwenta na ndoo' nquiuyaya na meiⁿ ticaⁿna' joona'. Saa jeeⁿ l'uena'. ²³ Ndo' cwii cwii nnom seii'a na nquiuyaya na tit'maⁿ la'xmaⁿna', cwil'aatyaaⁿ cwenta joona', ndo' cwii cwii nnom seii'a na tia nquiuyaya na nleitquioo'na' ndaaⁿ nn'aⁿ, cwita'nty'iuu'ndyotyaaⁿ joona' ²⁴ saa joo na tjacañjoom'ndyō yuu na titia nquiuyaya na nnty'iaaⁿ nn'aⁿ joona' meiⁿ ticaⁿna' na nla'cuu'ndyō. Jo' chii cwiwitquioo' na Ty'ōots'om seicañjoom'm cha'waandyōñ'aaⁿ, ndo' joo na cwila'cuu'ndyō, joona' t'maⁿti mañequiaaⁿ na cwila'xmaⁿna'. ²⁵ Luaa' waa na s'aaⁿ na tjacañjoom'ñe ts'aⁿ cha ticatseitiuu ts'aⁿ na ya nnc'oomñe meiiⁿ ticañ'eⁿ cwii joona'. Ee tqueeⁿ nmeiⁿ cha catei'jndeiindyena' cwii cwii nnom seii'a na tjachuii'na'. ²⁶ Manc'e jo' chii quia wi' mach'eena' cwii joo na tjacañjoom'ñe ts'aⁿ, wi' mach'eena' cha'waañê. Ndo' quia ya cwii joona', cha'waañê yaaⁿaⁿ.

²⁷ 'O cwiluiindyō' seii' Cristo, ee cwii cwiindyō' matseixmaⁿ cwii cwii na tjacañjoom'ñê na matseicandaa'ñena' seiiⁿeⁿ. ²⁸ Maluaa' matseijomna' na jnda seijndaa'ñe Ty'ōots'om quii'ntaaⁿ nn'aⁿ na cwiluiindyena seii' Cristo. Najndyee tqueⁿ apóstoles, nda we nn'aⁿ na cwi't'mōōⁿ ñ'oom na jnda t'mōōⁿ ndaana, jnda ndyee nn'aⁿ na cwi't'mōōⁿ ñ'oom naya 'naaⁿaⁿ, mati nn'aⁿ na ndaaⁿ nl'a 'naaⁿ t'maⁿ na xocandaaⁿ nluina' cwe' najndei nquii ts'aⁿ, nda jo' nn'aⁿ na ndaaⁿ nla'n'maⁿna nn'aⁿwii, nda jo' nquiee na cwila'jndaa'ndye ñ'oom, nda jo' joo nn'aⁿ na mats'ia jo' ndaaⁿ nla'neiⁿna nt'omcheⁿ nnom ñ'oom na tjachuii'.

²⁹ Ticha'tsondye cwiluiindyē apóstoles, meiⁿ nchii cha'tsondye cwiluiindyē profetas. Ticha'tsondye laxmaⁿ nn'aⁿ na cwi't'mōōⁿ chiiu

ma'moⁿ ñ'oom'm. Meiⁿ nchii cha'tsondye cwil'a ts'iaaⁿ t'maⁿ na tixocandaa nluina' cwe' cantyja 'naaⁿ najndeii na matseixmaⁿ nquii ts'aⁿ. ³⁰ Meiⁿ ticha'tsondye ndaa nla'n'maⁿ nn'aⁿwii. Mati ticha'tsondye ndaa nla'neiⁿ ñ'oom na tjachuii' ñequio ñ'oom na macwixjeⁿ cwila'neiⁿ, meiⁿ nchii cha'tsondye ndaa nla'teincoo' ljo' cwit'mooⁿ ñ'oom'ñeeⁿ. ³¹ Jo' chii jo nnom Ty'oots'om queⁿndyo' na nla'xmaⁿ'yo' nt'om ts'iaaⁿmeiⁿ na t'maⁿticheⁿ la'xmaⁿna'. Ndo' je' ñeca'mooⁿya ndaa'yo' cwii nnom na mañequiaaⁿ quii' n'ooⁿya na cwiluiit'maⁿñeti juuna', nchiiti cha'tso nmeiⁿ'.

C'ooⁿya na wi' n'ooⁿ nc'iaaya

13 ¹ Xeⁿ ndaa nntseinaⁿya nt'omcheⁿ nnom ñ'oom na cwila'neiⁿ nn'aⁿ, meiiⁿ ñ'oom na cwila'neiⁿ ángeles, saa tic'ooⁿ na wi' ts'ooⁿya nn'aⁿ, matseijomna' cantyja 'naⁿya cha'cwijom na c'uaa tsom' na cwitjo' oo cha'cwijom ncjo cañjeeⁿ na cantseii' jndyeena'. ² Ndo' xeⁿ ndaa nntseinaⁿ ñ'oom na ma'moⁿ Ty'oots'om nooⁿ ndo' matsei'noⁿ'a cha'tso na wanty'iuu' na matseijndaa'ñê na mandin'eeⁿ cha'tso na matsei'noⁿ'a, hasta ndaa nquindyoo ntsjo nc'e na matseyu'ya ts'ooⁿ, saa xeⁿ tic'ooⁿya nawi' ts'ooⁿya nn'aⁿ, meiⁿchjoo tjayuu l'uendyo. ³ Ndo' xeⁿ cha'tso na malein'oⁿ mañequia ndaa ndyeñeeⁿ ndo' meiiⁿ mañequiandyo na nla'cuee' nn'aⁿ ja ñequio chom, saa xeⁿ tic'ooⁿ na wi' ts'ooⁿ nn'aⁿ, tjaa yuu l'uendyo.

⁴ Juu ts'aⁿ na jnda ntyjii nn'aⁿ, ticiation ts'om ñ'eⁿ naⁿñeeⁿ, mal'ueeⁿ chiuu nnteijneiⁿ nn'aⁿ, titaa' ts'oom, titseis'añê titseiscuñê cantyja 'naaⁿ'aⁿ, ⁵ tintjeiⁿñe ñ'eⁿ nc'iaa', nchii ñequii'cheⁿ na m'aaⁿ ts'om cantyja 'naaⁿ' nquii, nchii ntyja ntyja matseiw'ii. ⁶ Juu na cwil'a nn'aⁿ na cwila'tjoondyena, tineiiⁿ'eⁿ, saa quia na majo'ndyo cwil'a nn'aⁿ, m'aaⁿ na neiiⁿ'eⁿ. ⁷ Ts'aⁿ na jnda ntyjii x'iaa' matseiquii ts'oom cha'tso na matjoom, ñequio na macantyyaa' ts'oom ndo' ñequio na ticiation ts'oom cantyja 'naaⁿ joona'.

⁸ Juu na m'aaⁿ ts'aⁿ na wi' ts'om x'iaa' tijoom cantycwiina'. Nncue'ntyjo xjeⁿ na tixocala'neiⁿ nn'aⁿ ñ'oom cantyja 'naaⁿ 'naⁿ na quia nluii, meiⁿ xocala'neiⁿna ñ'oom na tjachuii', meiⁿ xocaⁿna' ñ'oom na jndo' n'om nn'aⁿ. ⁹ Ee ticandaa'ñ'eⁿ cwila'nooⁿ'â ndo' mati quia nla'nooⁿñ'aayâ ñ'oom'm na cwiñequiaayâ, ¹⁰ saa quia nncwjee' juu na candaa'ñ'eⁿ quia jo' n'ndiina' nmeiⁿ na ticandaa' la'xmaⁿ. ¹¹ Quia ñet'ooⁿ na tyochjoo ja, tyotseinaⁿya, tyotseitiuuya ndo' ñet'oom' ts'ooⁿ cha'xjeⁿ cwii yucachjoo, saa quia na tue'ntyjo chuu'a 'ndi na ñet'ooⁿya cha'na joona. ¹² Ndo' maluaa' waa na matseijomna' cantyja 'naaⁿyâ, je' juu na cwila'nooⁿ'â cantyja 'naaⁿ Ty'oots'om, matseijomna' juuna' cha'cwijom na manty'iaa' ts'aⁿ nnon tsjo'jñom na jnda teitsaⁿ nnomna'. Saa juu na candaa'ñ'eⁿ quia na jnda tyjee'cañoom juuna' quia jo' candaa'ñ'eⁿ nntsei'noⁿ'a. Je' cwe' xeⁿntaⁿ xeⁿntaⁿ matsei'noⁿ'a saa quia

ljo'cheⁿ nntsei'noⁿ t'cuundyö cha'xjeⁿ nquii Ty'oots'om candaä'ñ'eⁿ mawajnaⁿ aⁿ ja.

¹³ Niom ndyee nnom na waa ndo' waana': na matseyu'ya ts'om ts'aⁿ ñ'eⁿ Ty'oots'om, na macantyjaa' ts'om ts'aⁿ ñ'eⁿ jom ndo' na m'aaⁿ na jeeⁿ candya' ts'oom jaa, saa t'maⁿti naquii' ntaaⁿ ndyee nmeiiⁿ, juu na m'aaⁿ na candya' ts'oom nn'aⁿ.

Nn'aⁿ na ndaaⁿ nla'neiⁿ ñ'oom na tjachuii'

14 ¹ Jo' chii cjoo' n'om'yo' na c'om'yo' na jnda nquiu'yo' nn'aⁿ ndo' mati cantyjaa' n'om'yo' na nquii Espíritu Santo ñnequiaaⁿ na nda'yo' na ndaaⁿ nl'a'yo' ts'iaaⁿ 'naaⁿ Ty'oots'om, majndeiticheⁿ na ndaaⁿ ñnequia'yo' ñ'oom'm. ² Ee ts'aⁿ na matseineiⁿ meiⁿnquia nt'omcheⁿ nnom ñ'oom cwe' tomti nnom Ty'oots'om matseineiⁿ, nchii ndaaⁿ nn'aⁿ nc'e tjaa 'ñeeⁿ juu na matsei'noⁿ ñ'oom'ñeeⁿ. Cantyja 'naaⁿ Espíritu Santo matseineiⁿ ñ'oom na wanty'iuu' m'aaⁿna', saa tjaa 'ñeeⁿ juu nntsei'noⁿ ñ'oom'ñeeⁿ. ³ Saa ts'aⁿ na mañequiaa ñ'oom' Ty'oots'om, 'oonajnda nc'iaaⁿaⁿ na cwilayu' nc'e ts'iaaⁿ na mach'eeⁿ ndo' cantyja 'naaⁿ na ljo' cwiñ'omt'maaⁿndyena n'omna, ñ'oom'ñeeⁿ matseinjoom'na' joona. ⁴ Juu ts'aⁿ na ndaaⁿ nntseineiⁿ cwiicheⁿ nnom ñ'oom na tjachuii', jaawijndei cheⁿnqueⁿ cantyja 'naaⁿ Espíritu Santo saa juu ts'aⁿ na matseineiⁿ ñ'oom na ma'moⁿ nquii Ty'oots'om nnom, ts'iaaⁿñeeⁿ mach'eenaa' na 'oonajnda nn'aⁿ tmaaⁿ cwentaaⁿaⁿ. ⁵ Ya ntyjii xeⁿ cha'tsondyo' ya nlaneiⁿyo' nt'omcheⁿ nnom ñ'oom na tjachuii' saa neiⁿtyaya na ñne'quia'yo' ñ'oom na ma'moⁿ Ty'oots'om ndaa'yo' ee juuna' xcweti, nchiiti juu na matseineiⁿ ts'aⁿ meiⁿnquia nnom ñ'oom na tjachuii'. Macanda xeⁿ na matseiteincoo' ts'aⁿ ñ'oom'ñeeⁿ cha joo nn'aⁿ tmaaⁿ na macwji' Ty'oots'om cwentaaⁿaⁿ nnc'oonajndana nc'e Espíritu Santo. ⁶ Jo' chii 'o nn'aⁿya na cwilayu'yo', meiⁿchjoo xocateijndeiina' 'o na nncjocandoo'a 'o xeⁿ na matseinaⁿ cwe' ñ'oom na tjachuii', saa xeⁿ na nntseinaⁿya ñ'oom na jnda t'moⁿ Ty'oots'om nooⁿya, oo cwii ñ'oom na matsei'ñoⁿa cantyja 'naaⁿ ñ'oom'm, oo cwii ñ'oom cantyja 'naaⁿ 'naaⁿ na quia nluii, oo cwii ñ'oom na m'mooⁿ ndaa'yo', nmeiⁿ mayuu' nnteijndeiina' 'o. ⁷ 'Naⁿ na cwiitjo' cha'na tsmaaⁿ ñequio arpa, xeⁿ nchii tjachuii' jndyena', xotsei'ñoⁿ ts'aⁿ cwaaⁿ cwii joona' macjo' ts'aⁿ. ⁸ Ndo' sondaro na matiom jndye ntu, xeⁿ tijndaa' c'uaa jndye mach'eeⁿ, tixocala'c'eendye nc'iaaⁿaⁿ na nl'ana ndia'. ⁹ Maluaa' matseijomna' cantyja 'naⁿyo', xeⁿ ñ'oom na cwilaneiⁿyo' tijndaa' joona' na cwindye nn'aⁿ, ¿chiuuya na nla'noⁿna ljo' na cwindu'yo? Nntseijomna' cantyja 'naⁿyo' cha'cwijom ts'aⁿ cwe' matseixuaato quii' jndye.

¹⁰ Nnts'aacheⁿna' jndye nnom na tjachuii' na cwila'neiⁿ nn'aⁿ tsjoomnancue, ndo' cwii cwii joona' majndaa' ljo' ma'moⁿna'. ¹¹ Saa xeⁿ titsei'ñoⁿa ljo' ma'moⁿ ñ'oom na matseineiⁿ ts'aⁿ cwii ñ'oom'ñeeⁿ, nntseijomna' ja cha'cwijom ts'aⁿ cwiicheⁿ ndyuaa ndo' maljo'yu ntyjeeⁿ

ñ'eⁿ ja. ¹² Jo' chii nc'e na cwila'queeⁿ n'om'yo' na ñequiaa Espíritu Santo na nlaxmaⁿyo' ts'iaaⁿ 'naaⁿaⁿ, cjoo'ya n'om'yo' na jndye nnom ts'iaaⁿ 'naaⁿaⁿ na nla'xmaⁿyo' na ñequiaana' na nnc'oonajndann'aⁿ tmaaⁿ cwentaa' Ty'o^ots'om.

¹³ Jo' chii ts'aⁿ na matseineiⁿ ñ'oom na tjachuii', caⁿ nnom Ty'o^ots'om na ndaa nntseiteincoom'm juuna'. ¹⁴ Ee xeⁿ matseinaⁿ nnom Ty'o^ots'om ñequio cwii nnom ñ'oom na tjachuii' na nchii ñ'oomya, na mayuu' matseinaⁿya ñequio espíritu 'naⁿya saa tic'oom' ts'o^o cantyja na mats'aa. ¹⁵ Quia jo' ¿chiiu macaⁿna' na cats'aa? Matsona' na catseinaⁿya cantyja 'naaⁿ espíritu 'naⁿya ndo' mati ñequio na nla'noⁿya nn'aⁿ ljo' na matseinaⁿ. Macaⁿna' na cataya ñequio espíritu 'naⁿya ndo' mati ñequio na cwila'noⁿya nn'aⁿ ljo' na mataya. ¹⁶ Xeⁿ quia na matseineiⁿ ñ'oom na tjachuii' matseit'maaⁿndyu' Ty'o^ots'om, 'u mañequiaa' na quianl'uaaⁿaⁿ ñequio na xcwee'ya ts'om', saa ts'aⁿ na ticatsei'noⁿ ñ'oom na matseineiⁿ, ¿chiiu nnts'aayuu na nntso Amén? ee cha ntyjii ñ'oom na matseineiⁿ. ¹⁷ Nnts'aacheⁿna' na 'u xcwe mañequiaa' na quianl'uaa' Ty'o^ots'om saa ticateijndeina' tsaⁿñeeⁿ na nncjaanajneiⁿ na matseyoom'm. ¹⁸ Mañequia na quianl'uaa' Ty'o^ots'om na majndyeti ñ'oom na cwichuii' matseinaⁿya, nchiiti 'o, ¹⁹ saa quia na m'aaⁿya quii'ntaaⁿ nn'aⁿ tmaaⁿ na macwji Ty'o^ots'om cwentaaⁿaⁿ, yati ntyjii na cwe' ñe'om ñ'oom nntseinaⁿ na ya nla'noⁿ nn'aⁿ, nchiiti quii meiiⁿ ñ'oom ñequio ñ'oom na tjachuii'.

²⁰ 'O nn'aⁿya na cwilayu'yo', cantyja 'naaⁿ natia, cala'xmaⁿyo' cha'na yonch'u saa cantyja 'naaⁿ na m'aaⁿ n'om'yo' ñ'oomwaa', cala'xmaⁿyo' cha'na nn'aⁿ na jnda tquiee n'om. ²¹ Ee naquii' ñ'oom' Ty'o^ots'om na teiljeii matsona': "Ñequio ñ'oom na cwichuii' na cwila'neiⁿ nn'aⁿ nt'omcheⁿ ndyuua nntseinaⁿya ndaa nn'aⁿ tyuaawaa saa meiiⁿ na luaa' tixocala'ñ'oom'ndyena chiiu matsjoo", luaa' matso nqueⁿ na tseixmaaⁿ na catsaⁿntjoom. ²² Quia na ndaa nntseineiⁿ ts'aⁿ ñ'oom na tjachuii' ñequio ñ'oom na maxjeⁿ matseineiⁿ, juu jo' tseixmaⁿna' 'naaⁿ jo ndaa nn'aⁿ na tyoola'yu'. Saa juu na ndaa nntseineiⁿ ts'aⁿ ñ'oom na jnda t'moⁿ Ty'o^ots'om nnoom tseixmaⁿna' 'naaⁿ jo ndaa nn'aⁿ na cwila'yu', nchii cwentaa nn'aⁿ na tyoola'yu'. ²³ Ee quia cwitjomndyo' na laxmaⁿyo' tmaaⁿ na macwji' Ty'o^ots'om cwentaaⁿaⁿ, ndo' xeⁿ cha'tsondyo' cwilaneiⁿyo' ñ'oom na tjachuii', ndo' jo' jo' nncjaquiee' cwii ts'aⁿ na quia mandiicheⁿ ñ'oom' Ty'o^ots'om oo ts'aⁿ na tyootseyu' jom, nntseitiuutoom na 'o jnda teintjeiⁿndyo'. ²⁴ Saa xeⁿ cha'tsondyo' cwilaneiⁿyo' ñ'oom na ma'moⁿ Ty'o^ots'om ndaa'yo' ndo' xeⁿ juu xjeⁿñeeⁿ nncjaquiee' cwii ts'aⁿ na tyootseyu' oo ts'aⁿ na quia mandiicheⁿ ñ'oom' Ty'o^ots'om, nlco'tiana' ntyjeeⁿ na waa jnaaⁿaⁿ ndo' nnc'oom' ts'oom cantyja 'naaⁿaⁿ nc'e ñ'oom na cwilaneiⁿyo'. ²⁵ Ndo' na ljo' nleitquioo' cha'tso na wanty'iuu' na m'aaⁿ ts'oom. Quia jo' lcoom'm

xtyeeⁿ na nntseit'maaⁿñê Ty'oots'om ndo' nntsei'nooⁿoⁿ na mayuu'cheⁿ m'aaⁿ Ty'oots'om quii'ntaaⁿyo'.

Cha'tso canda̱a'ya caluii xjeⁿ na cwiitjomndyena

²⁶ Quia jo' 'o nn'aⁿya na cwila'yu'yo' quia cwiitjomndyo' na cwila't'maaⁿndyo' Ty'oots'om, nt'omndyo' 'o cata'yo' salmos, nt'omndyo' 'o cat'moⁿyo' ñ'oom na jnda t'moⁿ Ty'oots'om ndaa'yo', nt'omndyo' 'o ndaa nlaneiⁿyo' nt'omcheⁿ nnom ñ'oom na tjachuii' ñequio ñ'oom na maxjeⁿ cwilaneiⁿyo', ndo' nt'omcheⁿ nc'iaa'yo' cala'teincoo'na chiuu cwiit'mooⁿ n'oom'ñeeⁿ. Saa cha'tso na cwil'a'yo' caluiina' na cateijndeina' na nnc'oonajnda nn'aⁿ na cwila'yu'. ²⁷ Quia na m'aⁿ nn'aⁿ na cwila'neiⁿ ñ'oom na tjachuii', ñequii'cheⁿ ñe'we oo ndyeendyena na nla'neiⁿna. Cwii ndo' cwiindyena nla'neiⁿna ndo' mati ñ'eⁿ ts'aⁿ na nntseiteincoo' ñ'oom'ñeeⁿ. ²⁸ Ndo' xeⁿ quii'ntaaⁿ nn'aⁿ tmaaⁿ cwentaa' Ty'oots'om tjaa'naⁿ ts'aⁿ na ndaa ntseiteincoo' ñ'oom'ñeeⁿ, yati na tintseineiⁿ ñ'oom na tjachuii' ndaa nn'aⁿ na cwila'yu'. Cwe' naquii' ts'om nquii catseineiⁿ ñequio Ty'oots'om. ²⁹ Ndo' cantyja 'naaⁿ nn'aⁿ na cwila'neiⁿ ñ'oom na ma'moⁿ Ty'oots'om naquii' n'om, cala'neiⁿ meiiⁿ we oo ndyeendye joona ndo' nt'om nc'iaana queⁿ cwenta aa xcwe n'oom'ñeeⁿ. ³⁰ Saa xeⁿ waa na m'moⁿ Ty'oots'om nnom cwiicheⁿ ts'aⁿ na wacatyeeⁿ jo' jo', quia jo' juu ts'aⁿ na mañequiaa ñ'oom quiaaⁿ na wanaaⁿ na nntseineiⁿ tsaⁿñeeⁿ. ³¹ Ndo' na luaa' cwii ndo' cwii ts'aⁿ ndaa nntseineiⁿ ñ'oom na ma'moⁿ Ty'oots'om naquii' ts'om cha nnc'ooliu nn'aⁿ na cwila'yu' ndo' nnc'oola'noⁿtina. ³² Juu ts'iaaⁿ na mañequiaa ts'aⁿ ñ'oom na ma'moⁿ Ty'oots'om naquii' ts'oom, matsona' na joo nn'aⁿ na cwiñequiaa ñ'oom c'omna xjeⁿ 'naaⁿ x'iaana na tjom cwiñequiana ñ'oom. ³³ Ee Ty'oots'om nchii cañ'eeⁿ cwiluiñê, jom cwiluiñê na tjoom' m'aⁿ nn'aⁿ ñequio nc'iaana.

Cha'xjeⁿ cwiwijndaa' quii'ntaaⁿ cha'tso ntmaaⁿ nn'aⁿ na macwjeeⁿeⁿ cwentaaⁿaⁿ, ³⁴ quia na cwiitjomndye nn'aⁿ na nla't'maaⁿndyena Ty'oots'om, matsona' na joo yolcu ñema'cheeⁿndyo c'omna ee ticwanaaⁿ na nla'neiⁿna xjeⁿñeeⁿ. Maca'na' na c'omna nacje 'naaⁿ s'aana cha'xjeⁿ na matsa'ntjom ljeii 'naaⁿ Ty'oots'om. ³⁵ Xeⁿ waa ñ'oom na ñe'caliuna, quiejndyeena w'aana, quia jo' cata'x'ena ñ'oom'ñeeⁿ ndaa s'aana. Ee tixcwe na mawax'ee yuscu cwii ñ'oom quia cwiitjomndye nn'aⁿ na cwila't'maaⁿndyena Ty'oots'om.

³⁶ C'oom' n'om'yo' na nchii quii'ntaaⁿ 'o jnaⁿjndyee ñ'oom' Ty'oots'om, meiⁿ nchii macanda ñencjo'yo' na jnda to'ñoom'yo' juuna'.

³⁷ Xeⁿ m'aaⁿ 'ñeeⁿ cwiindyoy' 'o na matseitiuu na cwiluiñê ts'aⁿ na mañequiaa ñ'oom' Ty'oots'om oo na waa cwii nnom ts'iaaⁿ na mañequiaa Espíritu na matseixmaⁿ, catsei'nooⁿoⁿ na ñ'oomwaa' na matseiljeiya, ñ'oom na matsa'ntjom Ta Jesús juuna'. ³⁸ Saa xeⁿ titseñ'oom'ñe ñ'oomwaa', tila'ñ'oom'ndyo' jom.

³⁹ Jo' chii 'o nn'aⁿya na cwila'yu', cala'queeⁿ n'om'yo' na ndaa ñequia'yo' ñ'oom' Ty'o^ots'om. Meiⁿ ticala'cu'yo' nn'aⁿ na cwila'neiⁿ nt'omcheⁿ nnom ñ'oom na tjachuii'. ⁴⁰ Saa cha'tso cantyja na cwitjomndyo', caluiina' cha'xjeⁿ na matsona' ndo' ñequio na xcweya m'aaⁿna'.

Cristo jnda mawando'xcoom

15 ¹ Ndo' je' je' 'o nn'aⁿya na cwila'yu'yo', matseilcwii'ndyonnda'a joo ñ'oom naya na jnda ñet'mooⁿya ndaa'yo'. Ñ'oom'ñeeⁿ jla'yu'yo' ndo' hasta xjeⁿ je'cheⁿ ndicwaⁿ tyeⁿ m'aⁿyo' cantyja 'naaⁿ juuna'. ² Nc'e juu ñ'oom naya'ñeeⁿ cwilui'n'maa'ndye añmaaⁿyo' xeⁿ cwiljoo'ndyo'tyeⁿyo' cantyja 'naaⁿ ñ'oom na tyoñequiaya ndaa'yo', meiⁿ ticwe' ts'iaaⁿndyo na jla'yu'yo'. ³ Tyo'mooⁿ ndaa'yo' ñ'oom na to'ñoⁿya na t'maⁿti tseixmaⁿna', na tue' Cristo cwentaa' jnaaⁿya cha'xjeⁿ cwit'mooⁿ ñ'oom' Ty'o^ots'om na teiljeii, ⁴ ndo' na ty'iuu nn'aⁿ jom, saa xuee na jnda ndyee tquiaa Ty'o^ots'om na tando'xcoom cha'xjeⁿ na matso ñ'oom'm na teiljeii, ⁵ ndo' teitquioo'ñê nnom Pedro nda jo' ndaa cha'tso apóstoles. ⁶ Jnda jo', teinoom' 'om siaⁿnto nn'aⁿ na cwila'yu', ñejom teitquioo'ñê ndaana na majndyendyeti naⁿñeeⁿ ndicwaⁿ cwita'ndo'na je' saa nt'om jnda tja. ⁷ Jnda jo' teitquioo'ñê nnom Jacobo ndo' jnda jo' teitquioo'ñê ndaa cha'tsondye apóstoles. ⁸ Ndo' na macanda mati teitquioo'ñê nooⁿ ja. Matseijomna' cantyja 'naⁿya cha'cwijom cwii yu'ndaa na jnda teinom'na' xjeⁿ na nluiñe. ⁹ Ee cha'tso nt'omcheⁿ apóstoles, t'maⁿti cwiluiindyena nchiiti ja, meiⁿ ticatseixmaⁿya na nntseicajndyu'na' ja cwii apóstol ee tyoco'wi'a tmaaⁿ nn'aⁿ na macwji' Ty'o^ots'om cwentaaⁿa'. ¹⁰ Saa na matseixmaⁿya apóstol je', matseixmaⁿya jo' nc'e naya na matseixmaⁿ Ty'o^ots'om, meiⁿ ticwe' ts'iaaⁿndyo juuna', ee seijndotyaya naquii' ts'iaaⁿ 'naaⁿa', nchiiti nt'omcheⁿ apóstoles, meiⁿ nchii cwiluii ts'iaaⁿñeeⁿ cwe' cantyja 'naⁿ nncó, saa cwiluii juuna' nc'e naya'ñeeⁿ na matseixmaaⁿ. ¹¹ Quia jo' tints'aa aa ja oo aa joona. Ñ'oomwa' ñ'oom na cwiñequiaayâ, ndo' juuna' ñ'oom na jnda jla'yu'yo'.

Nnta'ndo'xco nn'aⁿ na jnda tja

¹² Cwiñequiaayâ ñ'oom na tando'xcoom jnda na tueeⁿeⁿ, quia jo' ¿chiiu na ñ'eeⁿndyo' 'o na cwindu'yo' na taxocata'ndo'xco nn'aⁿ na jnda tja? ¹³ Ee xeⁿ tiyuu' na nnta'ndo'xco nn'aⁿ na jnda tja, quia jo' meiⁿ nquii Cristo tîcwando'xcoom. ¹⁴ Ee xeⁿ tîcwando'xcoom quia jo' juu ñ'oom na cwiñequiaayâ cwe' ts'iaaⁿndyo juuna' ndo' mati juu na cwila'yu'ya n'om'yo' cwe' ts'iaaⁿndyo. ¹⁵ Ee xeⁿ na mayuu' na ljo', quia jo' matseijndaa'ñena' cantyja 'naaⁿyâ na cwil'aayâ na cantuñe Ty'o^ots'om ee jnda macwil'uuyâ na tquiaaⁿ na tando'xco Cristo saa xeⁿ xocata'ndo'xco nn'aⁿ na jnda tja meiⁿ xocats'aana' na mayuu' na

tando'xcoom. ¹⁶ Ee joo nn'aⁿ na jnda tja, xeⁿ xocata'ndo'xcona, quia jo' meiⁿ nquii Cristo tîcwando'xcoom, ¹⁷ ndo' xeⁿ tîcwando'xcoom cwe' ts'iaaⁿndyo juu na cwilayu'ya n'om'yo' ñ'eⁿñê. Ndicwaⁿ cho' nqueⁿ'yo' jnaⁿ'yo'. ¹⁸ Ee xeⁿ luaa' waa mati nn'aⁿ na ñeja'yu' ñ'eⁿñê na jnda tja, jnda tsuundye. ¹⁹ Ee juu na cwicantyjaⁿ n'ooⁿya Cristo xeⁿ macandⁿ xjeⁿ na cwitandoo'a je' mawañoom'na' jaa, wanty'iaa'ndyotyaaⁿ na cha'tsondye nn'aⁿ.

²⁰ Saa ñ'oom na mayuu'cheⁿ na tqiaa Ty'oots'om na wando'xco Cristo. Matseijomna' cantyja 'naaⁿ'aⁿ cha'cwijom ntjom na cwiwe' jndyee ee quii'ntaaⁿ l'oo jom ts'aⁿ najndyee na tando'xco. ²¹ Cantyja 'naaⁿ cwii ts'aⁿ, jnaⁿ'na' na cwiwje nn'aⁿ tsjoomnancue. Mati cantyja 'naaⁿ cwii ts'aⁿ jnaⁿ'na' na cwita'ndo'xco nn'aⁿ. ²² Ndo' cha'xjeⁿ cantyja 'naaⁿ Adán cha'tsondye nn'aⁿ cwiwje, mati cantyja 'naaⁿ Cristo, cha'tsondye nn'aⁿ nnta'ndo'xcona. ²³ Saa majndaa' na nluii na ljo': najndyee tando'xco Cristo, nda jo' quia na nncwjee'nnaaⁿ'aⁿ, nnta'ndo'xco nquiee nn'aⁿ na cwiluiindyⁿ cwentaaⁿ'aⁿ. ²⁴ Quia jnda seityuii' Cristo cha'tsoñ'eⁿ na cwila'xmaⁿ na cwiqueⁿ xjeⁿ, ñequio cha'tso na cwitsantjom, quia jo' nntycwii cha'tsoñ'eⁿ. Nda jo' nquii na cwiluiiñê na matsa'ntjoom, ñequiaaⁿ cwentⁿ jo' l'oo Tsotyeeⁿ Ta Ty'oots'om. ²⁵ Ee tseixmaaⁿ na nntsa'ntjoom hasta xjeⁿ na jnda tju'cje Tsotyeeⁿ nacjee' nc'eeⁿ cha'tso na cwi'oo nacjoom'm. ²⁶ Juu na macandⁿ na nntseityueeⁿ'eⁿ na matseiweñe nacjoom'm, juu na mach'ee na cwiwje nn'aⁿ. ²⁷ Ee jnda tju'cje Ty'oots'om cha'tso nacjee' nc'ee Cristo, jo' chii quia na matsona' naljo', cwiwitquioo'ya na tic'oomna' nquii Ty'oots'om. Ee jom cha'tso jnda tqueeⁿ nacje 'naaⁿ Cristo. ²⁸ Nquii Cristo cwiluiiñê Jnda Ty'oots'om. Quia jnda s'aaⁿ na cha'tso na niom cwitue'ndyecje jo nnoom, quialjo' manquityeeⁿ nncju'ñecjeeⁿ nnom Ty'oots'om cha nntseixmaⁿ na tjacantyja na t'maⁿ cwiluiiñê jo ndaa cha'tsoñ'eⁿ.

²⁹ M'aⁿ nn'aⁿ na cwiwits'oomndye cwentaa nn'aⁿ na jnda tja. Saa xeⁿ na mayuu' tjaa'naⁿ na cwita'ndo'xco nn'aⁿ na jnda tja, quia jo' ðljo' ts'iaaⁿ na cwiwits'oomndyena cwentaa l'oo? ³⁰ Ndo' xeⁿ ticata'ndo'xco nn'aⁿ na jnda tja ðchiuu na jâ cha'tso xjeⁿ m'aaⁿyâ na teincuu' waa na cwitjooⁿyâ? ³¹ Ee 'io ndi 'io m'aaⁿya na teincuu' na ñe'catseicuee'na' ja. Ndo' na ljo', ñ'oom na mayuu' jo' cha'xjeⁿ mati na mayuu' na mañequiaana' na neiⁿya na cwiluiindyⁿ nn'aⁿ na cwila'yu' ñequio Jesucristo na nqueⁿ cwiluiiñê na matsa'ntjoom jaa. ³² Tsjoom Éfeso sejindoya cwii ts'ooⁿ ñequio quioo' wje saa meiiⁿ na ljo' ðyuu waa na mawantjoⁿ? Ee xeⁿ na mayuu' na ticata'ndo'xco nn'aⁿ na jnda tja yati cal'aaya cha'xjeⁿ cwilue nn'aⁿ: “Cwa cwaa'a ndo' cwaaya ee 'iocha luaa' nncwjaaya.”

³³ Tiñe'quiandyⁿ na ñe'nquiu'nn'aⁿ'na' 'o. Waa ñ'oom na matso ts'aⁿ: “Joo nn'aⁿ na tis'a la'xmaⁿ cwila'ndaa'na ts'iaaⁿ na ya na cwiluii.”

³⁴ C'oom'nnda' n'om'yo' cha'xjeⁿ na matsona' na cal'a'yo'.

Tsacwi'ntyje'yo' na cwil'a'yo' jnaⁿ ee m'aⁿ nt'omndyo' 'o na ticalaxmaⁿ'yo' cantyja 'naaⁿ Ty'o^oots'om. Matsjoo na ljo' cha calui'jnaaⁿ'ndyo'.

Nmeiiⁿ nlaxmaⁿ seiⁿ nn'aⁿ na nnta'ndo'xco

³⁵ Nnts'aacheⁿna' m'aaⁿ cwii ts'aⁿ na nncwax'eeⁿ: “¿Chiuu nluiiyuu na nnta'ndo'xco nn'aⁿ na jnda tja? ¿Chiuu mmaⁿ sei' na nla'xmaⁿna?”

³⁶ Tijndo' ts'om ts'aⁿ na luaa' nncwax'ee, ee tsjaaⁿ na nnom' ts'aⁿ cha'cwijom nncue'na' cha nncwando' ntjom'ndaa. ³⁷ Quia na wjaacanom' ts'aⁿ, nchii ts'oomtsjoo wjaacanoom'm, nnaⁿ wjacanoom'm oo tsjaaⁿ lqueeⁿ trigo oo cwiicheⁿ nnom tsjaaⁿ. ³⁸ Jnda na jnom' ts'aⁿ tsjaaⁿ'ñeeⁿ, nquii Ty'o^oots'om mañequiaaⁿ chiuu mmaⁿ'na' cha'xjeⁿ na l'ue ts'oom. Cwii cwii nnom tsjaaⁿ mañequiaaⁿ na nntseixmaⁿ juuna' cha'xjeⁿ na macaⁿna'. ³⁹ Cha'tso sei' tiñecwii xjeⁿ la'xmaⁿna'. Nn'aⁿ la'xmaⁿna cwii nnom sei', quioo' wandyo' seiiyo' ndo' cantsaa ñequio calcaa cwiicheⁿ nnom sei' la'xmaⁿyo'. ⁴⁰ Mati m'aⁿ cancjuu tsjo'luee ndo' m'aⁿ nt'om nnom na cwita'ndo' na tqueⁿ Ty'o^oots'om nnom tsjoomnancue, ndo' joo na m'aⁿ tsjo'luee cwichuii' na neiⁿncoo' joona' ñequio juu na neiⁿncoo' joo na m'aⁿ nnom tsjoomnancue. ⁴¹ Juu na caxueeñe ñe'quoom' cwichuii'na' ñequio na xuee chi' ñequio juu na caxueendye cancjuu, ndo' joo cancjuu cwichuii' na xueena' ñequio nt'omcheⁿ cancjuu.

⁴² Maluaa' waa na matseijomna' na cwichuii' na nla'xmaaⁿya quia na nntando'xcooya. Sei'ts'o na wjaanty'iuuñe ts'aⁿ tseixmaⁿna' cwii na nto' saa quia na nncwando'xcona', nntseixmaⁿna' cwii na tijoom cwii cue'.

⁴³ Juu ts'oo na nncjanty'iuu' tseixmaⁿna' cwii na tal'ue saa jeeⁿ neiⁿncoo' tseixmaⁿna' quia na nncwando'xcoom. Quia na wjaanty'iuuñe ts'oo, meiⁿcwii tjaa na nndaⁿ nnts'aaⁿ, saa quia na nncwando'xcoom jeeⁿ t'maⁿ najneiⁿ. ⁴⁴ Quia na wjaanty'iuu' sei'ts'o 'naaⁿ ts'aⁿ tseixmaⁿna' cantyja 'naaⁿ tyuaa, saa quia na nncwando'xcona' tseixmaⁿna' cantyja 'naaⁿ Espíritu Santo.

⁴⁵ Maluaa' waa na ma'moⁿ ñ'oom' Ty'o^oots'om na teiljeii, matsona': “Adán ts'aⁿ najndyee, tuiñe ñ'eⁿ ts'o ndo' s'aaⁿ na tando'”, saa nquii Adán na macanda cwiluiñe Espíritu, jom mañequiaaⁿ na cwita'ndo' nn'aⁿ. ⁴⁶ Nchii juu cantyja 'naaⁿ Espíritu tyowaajndyee, tyowaajndyee cantyja 'naaⁿ tyuaa, jnda jo' chii tuua cantyja 'naaⁿ Espíritu. ⁴⁷ Juu ts'aⁿ na t'oomjndyee s'aa Ty'o^oots'om juu ñ'eⁿ ts'o, tyotseixmaaⁿ cantyja 'naaⁿ tyuaa. Saa nquii ts'aⁿ na jnda we cwiluiñe na matsa'ntjoom, tseixmaaⁿ cantyja 'naaⁿ cañoom'luee. ⁴⁸ Seii'a nmeiiⁿ la'xmaⁿna' cha'na ts'aⁿ na tuiñejndyee ñequio ts'o. Saa seii'a na nlaxmaaⁿya quia na nntando'xcooya nlaxmaaⁿya cha'na seii' nqueⁿ na m'aaⁿ cañoom'luee.

⁴⁹ Cha'xjeⁿ tyowaa Adán na s'aa Ty'o^oots'om maluaa' cwimaaⁿ'a. Mati xjeⁿ na nntandoo'xcooya mmaaⁿ'a cha'xjeⁿ waa Cristo na m'aaⁿ cañoom'luee.

⁵⁰ 'O nn'aⁿya, ñe'catsjooya ndaa'yo' sei' ñequio ndei' leicandaa nntseijomna' joona' yuu na matsa'ntjom Ty'o^oots'om meiⁿ 'naⁿ na cwiwi'ndaa' xocandaa nntseijomna' joona' ñequio joo na ticantycwii na m'aⁿ. ⁵¹ Saa l'ue ts'o^o na nla'n^o'yo' cwii ñ'oom na wanty'iuu' m'aⁿna'. Ticha'tsondyo nncwjaaya saa cha'tsondyo nntseichuiina'. ⁵² Jeeⁿ cjee na nluii na ljo' cha'na cwii ndii' na nntseitsja ts'aⁿ lua'nnom, xjeⁿ na nleic'uaa ndu na macanda. Ee maxjeⁿ nleic'uaa ndu ndo' nnta'ndo'xco nn'aⁿ na jnda tja na tajom cwjennda'na. Ndo' nntseichuii'na' jaa. ⁵³ Ee jaa seii'a nmeiiⁿ na teincoondyo na wjaawi'ndaa'na' nlcwee'na' cwii na tijoom cwi'ndaa'. Jaa seii'a na nncue'na' nlcwaa'a cwii na tijoom ncue', m'aaⁿ ndo' m'aaⁿna'. ⁵⁴ Ee juu na laxmaaⁿya na cwiwi'ndaa'na', quia na jnda tcweena' juu na tijoom cwi'ndaa' ndo' juu seii'a na jaawe'na' quia na jnda tcweena' na tijoom cue', xjeⁿñeeⁿ nntseicandaa'ñena' ñ'oom' Ty'o^oots'om na teiljeii na matsona': "Jnda seityuii' Ty'o^oots'om najndeii na mach'ee na cwiwje nn'aⁿ. ⁵⁵ 'U na mache' na cwiwje nn'aⁿ, ¿je' je' yuu waa na cwii ndaa ntsa' ñ'eⁿndyo? Meiⁿchjoo tjaa yuu cwii cuaa na ncwantjom'." ⁵⁶ Juu jnaⁿ na laxmaaⁿya waa najndeii na matseixmaⁿna', jo' chii cwiwjaaya. Ndo' juu ljeii na tqeⁿ Moisés waa najndeii na matseixmaⁿna' na mañequiaana' na cat'uii jnaⁿ jaa. ⁵⁷ Saa jndye na quianl'uaa' Ty'o^oots'om na mañequiaaⁿ na cwinaⁿndyo nc'e nquii Ta Jesucristo na matsa'ntjoom jaa.

⁵⁸ Nc'e na luaa', 'o nn'aⁿya na jeeⁿ wi' ts'o^ona, caljoo'ndyo'tyeⁿ'yo' ñequio Ty'o^oots'om, ñecwiitco titsawintye'yo' na cwindye'ntjom'yo' nnom Ta Jesús ee manquiu'jndaa'ndyo' na jeeⁿ ticwe' ts'iaaⁿndyo juu ts'iaaⁿ nats'aⁿ nnoom.

Cwila'tjomna s'om na nl'ana naya nc'iaana na m'aⁿ Jerusalén

16 ¹ Cautyja 'naaⁿ ñ'oom na nla'tjom'yo' s'om na nl'a'yo' naya nn'aⁿ cwentaa' Ty'o^oots'om na wi' m'aⁿna Jerusalén, luaa matseijndo'a n'om'yo'. Cal'a'yo' cha'xjeⁿ na tsjoo na cal'a ntmaaⁿ nn'aⁿ na macwji' Ty'o^oots'om cwentaaⁿ'aⁿ ndyuua Galacia. ² Ticwii xueeneiⁿco' cwii cwiindyo' 'o calat'ue'yo' cwanti na ñnequia'yo' cantyja na cwitantjom'yo'. Quia jo' quia na nncuaya quii'ntaaⁿ'yo' nchii s'om quia nlat'ue'cheⁿ'yo'. ³ Ndo' catjeii'ndyo' cwii oo we x'iaa'yo' na cwila'n^o'yo' na joona ya na nnc'oon'omna s'om'ñeeⁿ Jerusalén. Quia jo' quia na nncua na m'aⁿ'yo', nntseiljeiya cwii tsom na nnc'oon'omna. ⁴ Ndo' xeⁿ macaⁿna' na nncjo jo' jo', quia jo' nnc'oona ñ'eⁿndyo.

Ñe'cjaacando' Pablo nn'aⁿ na cwila'yu' Corinto

⁵ Nncjo na m'aⁿyo' xeⁿ jnda tjowinoⁿ ts'oⁿndaa Macedonia ee maxjeⁿ matseijndaa'ndyo na jo' joindyaa. Jnda jo' nncuacañoⁿya 'o. ⁶ Nndaa nnts'aana' na nljoo'ndyo ñ'eⁿndyo' meiiⁿ ñe'cwantindyo xuee oo cha'waa ncueeteiⁿ. Quia jo' 'o nndaa nntsalacwanom'yo' ja nato quia na nncjo xeⁿ yuu cwijoyⁿ. ⁷ Ee ticaljoya ts'oⁿ na cwe' cjee cjee m'aaⁿna' nncwinooⁿ na m'aⁿyo'. Ntyjaa'ya cwii ts'oⁿ na majndye xuee nndaa nljoo'ndyo ñ'eⁿndyo', xeⁿ Ty'oⁿots'om l'ue ts'oom. ⁸ Saa jnda seijndaa'ndyo na nljoo'ndyotyā ñjaaⁿ tsjoom Éfeso hasta na jnda teinom xuee Pentecostés. ⁹ Ee jeeⁿ t'maⁿ maju'naañena' na mats'aa ts'iaaⁿ 'naaⁿ Ta Jesús ndo' jeeⁿ ticwe' ts'iaaⁿndyo meiiⁿ jndye nn'aⁿ m'aⁿ na jndoo ja.

¹⁰ Nndaa nnts'aana' na nncuee'cañoⁿom Timoteo 'o. Xeⁿ na ljo', cala'lui'yo' jom cha nljeii'na' na ya nnc'oomñê ñ'eⁿndyo'. Ee mati jom mañejuu ts'iaaⁿ 'naaⁿ Ta Jesucristo mach'eeⁿ cha'xeⁿ ja. ¹¹ Jo' chii meiⁿcwiindyo' 'o tinc'om'yo' na tila'ñ'oom'ndyo' jom. Ñequio na xcwee' n'om'yo' cateijndei'yo' jom cha quia nlueeⁿeⁿ quii'ntaaⁿyo' quia jo' nndyolcweeⁿeⁿ ñequio na neiiⁿeⁿ. Meiⁿndo'a jom ñequio nt'omcheⁿ nn'aⁿ na cwila'yu'.

¹² Tyocaⁿa nnom nquii nn'aaⁿya Apolos na catseijomñê ñequio nn'aaⁿya na cwila'yu' na cwi'oocajndoo'na 'o. Saa na maje'ndyo ticats'aana' ts'oom na ñe'cjaⁿ. Majo' nncuee'cañoⁿom 'o quia na ñnequiaana' na wanaaⁿ.

Xmaⁿndyo' na cha'tsondyo'

¹³ Queⁿi queⁿyo' cwenta chiuu cwii tsam'aⁿti'yo'. C'om'tyeⁿyo' na cwila'yu'ya n'om'yo' ñ'eⁿ Ty'oⁿots'om. Catsanajnda'yo' cantyja na cwila'yu'yo' ñ'eⁿñê cha'na nn'aⁿ na 'ooquiendye na ñe'cwii waa na cwil'a. ¹⁴ Cha'tso na cwil'a'yo', cat'moⁿyo' na wi' n'om' nc'iaa'yo'.

¹⁵ 'O nn'aⁿya, manquiu'yo' na cha'waa ts'oⁿndaa Acaya, juu Estéfanos ñequio nn'aⁿ waⁿaⁿ jla'yu'jndyena ñ'eⁿ Ty'oⁿots'om. Joono cwijoo' n'omna na cwindye'ntjomna ndaa nn'aⁿ na cwila'yu' ñ'eⁿñê jo' jo'.

¹⁶ Macwe' jo' macaⁿa na catue'ndyo'cye'yo' ndaa nn'aⁿ na la'xmaⁿ cha'na joona. Ndo' malaa'ti' cal'a'yo' ñequio cha'tso nn'aⁿ na cwilajomndye ñ'eⁿndyena na cwiteijndei ts'iaaⁿ 'naaⁿ Ty'oⁿots'om.

¹⁷ Jeeⁿ neiⁿya na jnda tyjee'cañoⁿom Estéfanos ja, ñequio Fortunato ñequio Acaico. Cha'cwijom manty'iaya ncjo'yo' na manty'iaya joona, ee jnda jla'noomndyena cantyja 'na'ya cwii na leicandaa nl'a'yo' na tic'oomndyo'. ¹⁸ Na jnda tquiena na m'aaⁿya, ñ'oom na jla'candiina ja tquiaana' na t'maⁿ ts'oⁿ, majo'ti nnts'aana' ñ'eⁿndyo' 'o quia na nlquiennada'na na m'aⁿyo'. Nn'aⁿ na cwindye'ntjomna cha'na joona matsona' na nla't'maaⁿndye nn'aⁿ joo naⁿñeeⁿ.

¹⁹ Ntmaaⁿ nn'aⁿ na macwji' Ty'o^ots'om cwentaaⁿ'aⁿ na m'aⁿ ts'o^ondaa Asiawaa cwila'cwanomna na xmaⁿndyo'. Majuu nn'aaⁿya Aquila ñequio scoom'm Priscila cwiluena na xmaⁿndyo' ndo' majo'ti cwilue nn'aⁿ tmaaⁿ na cwtjomndye w'aana ñequio xuee' nqueⁿ na cwiluiiñê na matsaⁿntjoom jaa. ²⁰ Cha'tsondye nn'aⁿ na cwila'yu' ñjaaⁿñe cwila'cwanomna na xmaⁿndyo'. Nc'e na cwiluiindyoy' ntseinda Ty'o^ots'om, quia cwtjomndyo' ñ'eⁿ nc'iaa'yo' na tjoom' cwila'yu'yo' ñ'eⁿndyena, cataⁿ'yo' lueena na cwiñe'quia'yo' na xmaⁿndyena.

²¹ Nnc^o Pablo na matseiljei xueya na matsjooya na xmaⁿndyo'.

²² Meiⁿcwi'ñeeⁿcheⁿ ts'aⁿ na ticajnda ntyjii nquii Ta Jesucristo, quiaa Ty'o^ots'om na quioo ñ'oomwi' nacjoo' tsaⁿñeeⁿ. Quiaaⁿ na matyuaa' cwjee'nnda' nquii Ta Jesucristo.

²³ Nquii Ta Jesucristo quiaaⁿ na c'oom naya na matseixmaaⁿ ñ'eⁿndyo'. ²⁴ Mañequiaana' na jeeⁿ jnda ntyjiiya 'o nc'e jom. Mantyjati luaa'ndyo. Amén.